

## جريمة الساحل الشمالي

رامي زين عريشة - جريمة الساحل الشمالي ، رواية

ISBN : 978-977-798-099-9

رقم الإيداع : ٢٠١٧/٢٩١٥٣

إن دار الحلم للنشر والتوزيع غير مسئولة عن آراء المؤلف وأفكاره ، وتعتبر الآراء الواردة في هذا الكتاب عن آراء المؤلف ، ولا تعبر بالضرورة عن آراء الدار .  
جميع حقوق الطبع والنشر محفوظة للدار  
ولا يجوز طبع أو إعادة استخدام أي جزء من العمل في أي صورة كانت  
إلا بموجب موافقة خطية من الناشر .



© دار الحلم للنشر والتوزيع

عضو اتحاد الناشرين المصريين

القاهرة - جمهورية مصر العربية

Mob : 00201141824562

dar\_el7elm@hotmail.com

info.darel7elm@Gmail.com

# جريمة الساحل الشمالي

رواية

رامي زين عريشة





إهداء

إليكم...



## المقدمة

قد تقودك الظروف إلى ارتكاب جريمة بدون سابق ميعاد ،  
ولكن الأخطر من ارتكاب الجريمة إستسهالها .

**المؤلف**



٢٠٠٨/٧/١٠:

(موجز أبناء الثامنه صباحاً على إذاعة الشرق الأوسط )

(إستيقظ رواد قرية مارينا ٤ صباح هذا اليوم على وجود جثه على إحدى شواطئ القرية ، هذا والجدير بالذكر أن الجثه مشوهة الملامح ، ورجال وحدة المباحث بقسم شرطة مارينا في المكان لإستجواب عمال الشاطيء وحالة من الذعر والقلق تسيطر على مارينا بأكملها خاصة وأنها الواقعه الأولى التى تحدث فى مارينا ، والتحريات

جارية لمعرفة هوية صاحب الجثه وسبب الوفاه )، إلى هنا تنتهى فقرتنا من موجز أبناء الثامنه صباحاً كان معكم رفيق عز الدين من إذاعة الشرق الأوسط تقبلوا تحياتى

\*\*\*\*\*

٢٠٠٨/٧/٢ (الساعة ١١ صباحاً) مدينة نصر - القاهرة :

بعد أن أنهى باسم الرشيدى مدير خدمة العملاء بشركة إس إن جروب لإستيراد الأجهزة الإلكترونية إجتماعه الإسبوعى مع الموظفين ، عاد بظهره إلى الخلف مسترخياً على كرسى مكتبه مغمضاً عينيه لبضعة ثوانى، ثم إعتدل فى جلسته مرة أخرى وأمسك بهاتفه المحمول من على المكتب و ضغط زر الإتصال ووضع الهاتف على أذنه منتظراً الرد و بمجرد أن رد الطرف الأخر قال (باسم) بصوت عالى يغلبه المزاح :

- هو أنا يابنى لازم أكلمك مليون مره عشان ترد ، فينك يا

بنى ؟

- بسوم

- بسوم إيه بس

- سامحنى يا صاحبى إنت عارف البورصه وشغلها

- يادى البورصه إلى مصدعنا بيها دى أمال لو كانت بتكسب

كنت عملت فينا إيه؟ ، ده أنا كل ما اتابع شريط الاخبار ألقى

البورصه خسرت اليوم كذا البورصه خسرت اليوم كذا شكلك

إنت اللى ناحسها ، المهم إيه الكلام فى الموضوع إلى قولتلك

عليه ؟

- موضوع إيه

- موضوع إيه؟! إنت مسطول يا بنى ؟

- آه آه تقصد موضوع الساحل

- أيوه

- أدينى مكلم واحد على موضوع كارنيه مارينا وربنا يسهل

- كارنيه؟!

- آه كارنيه ماله

- والكارنيه ده هيقضينا قد إيه

- يعنى إيه يقضينا قد إيه

- يعنى مسموح لنا نبات كام يوم بالكارنيه ده

- كإاااام يوم !

- أمال؟

- يابنى الكارنيه ده ليوم واحد بس

- يوم واحد إنت مسطول يا هيثم؟!

- ليه بس ؟

- ليه بس إيه بقولك يا أخى بقالى ٣ سنين مانزلتش بحر،

وواحد ٤ أيام أجازة سنوية بالعافية وانت عارف الأجازات

شكلها عامل إزاي .. تقولى يوم واحد؟!!

- طيب إيه اللى يرضيك

- إالى يرضينى ٤ أيام يا معلم من أولهم لأخرهم ونرجع تانى

أيام العذوبيه

- بس أربع أيام فى مارينا دول مبلغ وقدره يا باسم

- كام يعنى ؟

- معرفش بس أسمع إن الشاليهات فى مارينا غاليه

- كام يعنى ؟

- يعنى من ألف ونص وإنت طالع

- فى الليله؟!!

- لا فى السنه ، طبعاً فى الليله

- ياعم هيثم شوفلنا حد من معارفك وأنا عارفك مش هتغلب

وبالمره نشوف الواد معتز وحد كمان ونطلع شله خلص

وماتقفلش الدنيا

- ماشى يا باسم خلىنى أشوف كده وأكلمك

- ماشى بس إنجز يا هيثم عشان أجازتى هتبدأ كمان خمس

تيام ، أنا بقولك أهوه عشان إنت كمان تظبط حالك وتقدم

على أجازته ، أوك

- أوك يا باسم
- يالا عايز حاجه
- حبيبي تسلم
- مع السلامه
- مع السلامه

\*\*\*\*\*

٢٠٠٨/٧/٢ (الساعة ١١ مساءً) - المنيل - القاهرة :

يوم طويل لهيثم البحيرى الذى يعمل موظفاً بإحدى شركات المضاربه بالبورصة ..

إنتهى بمكسب لا بأس به أسعد عملاء شركته الذين عانوا كثيراً من سوء تقلبات أحوال البورصة وخاصة في آخر أسبوعين ، وصل بعده (هيثم) إلى منزله مستهلكاً يجرد قدميه لا يقوى على حمل ذبابه ، ومجرد دخوله من باب شقته إستلقى على أقرب كنبه وجدها في طريقه مستسلماً لا يحرك ساكناً ، وفي هذه الأثناء إخترق هذا الهدوء جرس هاتفه المحمول فقام بالنهوض من على الكنبه لإخراجه من حقيبه يده ثم ضغط على زر الرد قائلاً :

- زيزو إزيك

- إزيك يا هيثوم

- عامل إيه يا معتز

- الحمد لله ، إيه يابنى مال صوتك ؟

- مفيش ، خلصان لسه راجع من الشغل

- الله يعينك

- تسلم يا زيزو ، إيه الكلام

- مفيش باسم كلمنى النهارده الضهر كده وبيقولى ماتيجى  
 نطلع الساحل أنا وإنت والواد هيثم نغير جو وكده  
 - أه ماهو كلمنى أنا كمان النهارده الصبح وقولتله هشوف  
 - طب إنت إيه الكلام؟  
 - أنا كلمت كذا حد على شاليه هناك مش لاقى حد عنده  
 شاليه، ولا لاقى حد يعرف حد عنده شاليه بيتأجر فمش  
 عارف بقى الصراحة ..  
 - طب يا عم طالما العملية مقفلة كده ماتيجى نطلع نقضى  
 يوم هناك على البحر وكافتيريات وكده ونرجع القاهره مش  
 لازم بيات يعنى  
 - أنا قولت كده من الأول وكنت هجيب كارنيه من واحد  
 صاحبى يدخلنا نقضى يوم باسم قالى لاء يوم إيه أنا بقالى ٣  
 سنين منزلتش البحر، وعايزين نرجع أيام العذوبيه تانى وكده  
 وإنت عارف دماغ باسم  
 - طب إيه الحل طيب؟  
 - مش عارف  
 - طب سألت صلاح ؟  
 - صلاح مين ؟

- صلاح يابنى صلاح الصافى إلى كان شغال فى التسويق العقارى
- صلااااا اأ صحیح یاااه مجاش فى بالى ده غير إنى بقالى كتير  
ماإتصلتش بيه
- ورقمه إتمسح من عندى
- طيب بقولك إيه أنا هكلمه وأشوف الدنيا وأرد عليك أكيد  
يعرف حد
- تمام ماشى
- يالا سلام

\*\*\*\*\*

٢٠٠٨/٧/٣ (الساعة ٢ مساءً) - كوبرى القبة - القاهرة :

وصل معتز للتو إلى محل بيع الهواتف المحمولة الذى إستأجره منذ عام فى منطقة كوبرى القبة ، وبمجرد وصوله أخرج هاتفه المحمول للإتصال بصلاح الصافى لسؤاله بخصوص تأجير شاليه فى مارينا ، وضع معتز الهاتف على أذنه منتظراً رد صلاح على مكالمته :

- ألو (صلاح مجاباً)

- ألو

- أنا لما شوفت الرقم مصدقتش قولت تلايك إتصلت بيا غلط ولا حاجه

- ليه بس

- ليه بس إيه فينك يا بنى؟

- أهوه فى الدنيا بس معلش كنت متكعبل شويه الفتره اللى فاتت

- إيه خير؟

- لا مفيش سيبت الشركه إالى كنت شغال فيها والدنيا إتكعبلت معايا شويه

- سيبتها ليه؟



في التسويق العقاري فأكيد تعرف حد يظبطنا في الموضوع ده ،  
وبالمرة تطلع معنا نغير جو سوا إحنا بقالنا كتير ما إتقابلناش

- إنتوا عايزين الشاليه فين ؟ في أى قرية يعنى في الساحل ؟

- عايزينه في مارينا

- طيب عايزينوا من إمتى وقد إيه ؟

- بص إحنا عايزينوا تحديداً من يوم ٧/٧ لحد ٧/١٠

- يعنى أربع أيام

- مطبوط

- طيب سيبنى أشوف كده وأكلمك

- بس على السريع الله يكرمك

- حاضر

- هترد عليا إمتى

- سيبنى لحد بكره أشوف الدنيا وأكلمك ، اوك

- أوك

- مع السلامه

- مع السلامه

\*\*\*\*\*

٢٠٠٨/٧/٣ (الساعة ٨ مساءً) - غمره - القاهرة :

بعد أن أجرى صلاح عدة إتصالات بأكثر من شخص للبحث عن شاليه بمارينا لإستئجاره ، لم يجد شاليهات شاغره في هذا التوقيت وبعد أن سلك كل الطرق لم يعد أمامه سوى طريق واحد يسلكه ،ألا وهو طريق الدكتور طارق حسن الذى تقع الصيدليه الخاصه به في نفس الشارع الذى يقطن به صلاح ، دخل صلاح صيدلية الدكتور طارق حسن وبمجرد أن وقعت عين الدكتور (طارق) على (صلاح) خاطبه بود مازحاً :

- إزيك يا أبو صلاح

- إزيك يا دكتور

- إيه الأخبار

- الحمد لله ماشيه

- ربنا يصلحك الحال يارب

- تسلم يا دكتور

- أوامر يا جميل

- الأمر لله ...دكتور هو شاليه مارينا بتاع جوز أخت حضرتك إلى كنا ودينا سعد السباك عشان يظبط السباكه بتاعته قبل

كده أخباره إيه؟

- بخير بيسلم عليك
- هههههه لاء أقصد يعنى موجود لسه ولا باعه
- لا موجود ليه
- طيب بيأجره
- لاء ما أعتقدش لإنه صارف عليه كتير فى التشطيب، ده غير
- الفرش إالى فيه كمان مش فرش مصايف ده فرش شقق يتعاش
- فيها ، بس ليه أوامر
- مفيش والله جماعه زمايلى مكلمنى وعازين يأجروا شاليه فى
- مارينا أربع أيام يغيروا جوا وكده
- ممممم
- عازينوا من إمتى طيب
- بص هما عازينوا من يوم ٧/٧ لحد ٧/١٠
- تمام ، طيب بص سيبنى لحد بكره أكلمه فى السعوديه وأشوف
- الدنيا بس ما أوعدكش
- بس بالله عليك يا دكتور حاول كده
- ربنا يسهل حاضر
- تسلم يا دكتور
- إنت تؤمر

- هستنى تليفونك
- بأمر الله ، بس كده تمشى من غير ما تاخذ واجبك طب
- إستنى حتى خدلك حقنه
- ههههههههه لا ياعم ربنا يكفيننا الشر
- هههههههه مع السلامه
- مع السلامه

\*\*\*\*\*

٢٠٠٨/٧/٤ (الساعة ١ مساءً) مدينة نصر - القاهرة :

- سلامو عليكمو (معتز متحدثاً إلى موظفة الإستقبال بشركة إس إن جروب لإستيراد الأجهزة الإلكترونية )
- وعليكم السلام يا فندم
- لو سمحتى مكتب أستاذ باسم الرشيدى فين؟
- أوامر يا فندم فيه أى خدمه ممكن أقدمها لحضرتك؟
- لا ده أنا صديق شخصى ليه وكنت جاي أزوره
- تمام يا فندم مكتبه فى الدور الأول ثانى مكتب على إيد حضرتك اليمين
- متشكراًوى
- (معتز) طارِقاً باب مكتب (باسم)
- إتفضل (باسم مجاوباً)
- السلام عليكم
- وعليكم السلام ورحمة الله وبركاته أهلاً أهلاً إزيك يا زيزو
- الحمد لله إنت عامل إيه يا باسم؟
- الحمد لله
- إيه ياعم المفاجئة الجميله دى
- تسلّم ربنا يخليك ، مفيش كنت عند مورد إكسسوارات

موبايلات هنا في مدينة نصر بتفوق على شوية بضاعه للمحل  
عندى، فقولت أفوت أسلم عليك وأقولك آخر المستجدات في  
موضوع الساحل

- قول يا سيدى إشجيني

- مفيش طبعاً أستاذ هيثم البورصجى الفاشل ماوصلش لحاجه  
ومعرفش يظبطلنا شاليه نصيف فيه فقولت أشوف أنا الدنيا  
كده ، المهم كلمت صلاح الصافي بتاع التسويق العقارى فاكراه؟

- آه قابلناه مرتين قبل كده لما أنت عزمته يخرج معنا

- آه المهم كلمته لقيته ساب التسويق العقارى

- يادى النحس

- فقولتله على الموضوع وقولته اكيد تقدر بعلاقاتك تشوف لنا  
حاجه ، قالى طب سيبنى هشوف الدنيا كده وأكلمك ، المهم  
كلمنى هو من شويه كده وأنا عند المورد إالى كنت عنده  
وقالى على حاجه كده وقالى ده الحل الوحيد قدامى

- إيه الحاجه

- قالى إنه كلم واحد صاحبه دكتور فاتح صيدليه جنب بيته  
على شاليه بتاع جوز أخته فى مارينا ٤ عشان نأجره وكده  
،وإن الدكتور صاحبه قاله خلىنى أكلم جوز أختى فى السعوديه

أشوف حابب يأجره ولا لاء

- وبعدين

- صلاح كلمنى وقالى إن الدكتور صاحبه ده كلم جوز أخته،

وجوز أخته قاله إنت عارف إنى مش بأجر الشاليه لحد لإنه

مصروف عليه كتير فى التشطيبات والفرش

- والمصيفين بيهدلوا الحاجه بس طالما دول مش ناس غريبه

وأصحابك يشرفوا ويروحوا يقعدوا فى الشاليه براحتهم، من غير

إيجار لإنى فى الأساس مش بأجره لا لقريب ولا لغريب، بس أنا

عارف طالما أصحابك ييقوا أكيد محترمين لإنى عارف أكيد إنت

مصاحب مين ، بس بعد إذتك تكون إنت موجود معاهم فى

المصيف وأهو بالمره تبص على الشاليه لإنه من السنه إالى

فاتت ما إتفتحش وعشان تبقى إنت المسئول قدامى

- مميم تمام تمام تمام ، يعنى صاحب صلاح هيدينا الشاليه

أربع أيام ببلاش

- تمام

- والله يشكر ، بس المشكله إننا مانعرفش صاحب صلاح ده

إيه نظامه زينا كده واد حبوب وظريف ولأ واد قفيل ورخم

- والله أنا ما أعرفوش كل إالى أعرفه عنه إنه دكتور، فاتح

صيدليه جنب بيت صلاح

- طيب يعنى مبدئياً كده موضوع الشاليه إتحل

- بالظبط

- أدى حاجه ، الحاجه التانيه هنطلع بعريه مين عربيتى ولا

عريه هيثم

- غالباً عربيتك لإن عريه هيثم بتتصلح

- تمام ، طب والأكل شايف إيه ناخد اكلنا معانا من هنا

معلبتنا.. ميتنا.. عصيرنا ..سجايرنا من هنا ولا نشترى من هناك

- لا ياعم كل حاجه هناك إحنا إيه اللى هيشيلنا من هنا

- وإحنا هنشيل على إيدينا ماشنطت العريه موجوده

- ياعم إسمع بس خيلنا خوفاف خوفاف

- أوك ، طب بلغت هيثم بموضوع الشاليه ؟

- لاء لسه

- طب بلغه طيب عشان يؤكد أجازته ويجهز نفسه

- طيب المهم أرد على صلاح بخصوص الشاليه أقوله تمام

-آه تمام وقوله يظبط حاله على يوم سبعة إن شاء الله هنطلع

- تمام على خيره الله ،وبخصوص هنتقابل الساعه كام وفين يوم

سبعة نظبطها بالتليفون مع بعض أوك

-أوك

- طيب أستأذن أنا بقى

- ما أنت قاعد يابنى

- يادوبك على ماأوصل للمحل، وأكلم هيثم وصلاح وأظبط

الدنيا

- أوك

- مع السلامه

- الله يسلمك

\*\*\*\*\*

٢٠٠٨/٧/٥ (الساعة ١١ مساءً) منشية الصدر - القاهرة :

وصل الدكتور طارق إلى منزله ، وبمجرد أن دخل وأغلق باب

الشقه وجد زوجته (إسراء)أمامه فقالت له مداعبة :

-مزوغ بدرى ليه يا دكتور النهارده؟

فرد عليها قائلاً :

- مفيش الرجل خفيفه النهارده، فقلت أجبى بدرى أقعد

معاكو شويه

-ياعيني ع الحنيه

-أنا غلطان يعنى أقوم أنزل تانى ، حقكوا عليا يا ناس

حقكوا عليا

فردت (إسراء) ضاحكة :

- خلاص يا عم إنت هتعملى مظاهره ، وطى صوتك علشان

العيال نايمين

- ولاد ال..

- ولاد الإيه

- ولاد الدكتور ، يعنى أنا يوم ما أجبى بدرى عشان أقعد معاهم

ألاقيهم نايمين ، بقولك إيه ، كنت عايزك فى موضوع كده

- همممممممم ، موضع إيه

- همممممممم إيه إنتى هتزوومى ، تصبى على خير
- إسراء ضاحكة : خلاص خلاص قول ياعم الحاج
- مفيش أنا طالع الساحل يومين كده
- بجد! طالعين الساحل بجد
- طالعين طالعين ، إنتى ساقطه نحو يا بنتى بقولك طالع
- لوحك
- لأ طبعاً مش لوحدى مع جماعه أصحابي كده
- جماعه أصحابك!
- أيوه جماعه أصحابي، إيه فيها إيه غريبه دى؟
- لأ مش غريبه بس من ساعة ما إتجوزنا عمرك ماطلعت
- مصيف مع أصحابك وسييتنا ؟
- هعمل إيه يا حبيبتي ، الناس قصدوني في شاليه عشان مش
- لاقين شاليه يأجروه فقو..
- قصدوك وفي شاليه !، هو انت شغال سمسار يا حبيبى وأنا
- ماعرفش!؟
- عزيزى المستمع بصبح عليك ممكن بعد إذنك تكفى قليلاً
- عن اللماضه وتسمعيني للأخر.
- (إسراء و حاجبها الأيمن مرفوع إلى أعلى و حدقتا عينيها متسعتان)

- كمل

- واحد صاحبي إسمه صلاح جالى الصيدليه من يومين ،وقالى إن هو وجماعه أصحابه عايزين يطلعوا مصيف الساحل الشمالى،ومش لاقين شاليه وصلاح عارف إن أختى وجوزها عندهم شاليه فى مارينا ،بحكم إن هو إالى كان جايب السباك عشان يظبط شوية حاجات فى الشاليه قبل كده ،فقولتله سيبنى أكلم جوز أختى وأشوف الدنيا فكلمت الراجل فى السعوديه ورحب بالموضوع

- طيب تمام ما يروحوا هما إنت دخلك إيه ؟

- ما (نبيل) جوز أختى مشترط إنى أروح معاهم ،عشان أبص على الشاليه وأجيب حد ينصفه بالمره

- ممممم ، مسافرين إمتى ؟

- بعد بكره إن شاء الله

- والمطلوب منى

- (طارق) مازحاً : تتغاضى .. قصدى ده إسمه كلام برضه يا

حببىتى مش لازم أعرفك

- ولا هسافر من غير ما أقولك ؟

- أه ماكنت إعملها بالمره ماهو ده إالى ناقص

- كان نفسى

- نعم

- عمرى

- (إسراء) وعلى وجهها علامات حزن مختلطة بالدلال : على

العموم تروح وتيجى بالسلامه يا حبيبي، وإعمل حسابك إن

دى هتكون أول وآخر مره تسافر فيها مصيف لوحدك يعنى

ماتجيش السنه إالى جايه تقولى أصل مش عارف إيه

- (طارق) مازحاً : تمام يا حضرة الضابط

\*\*\*\*\*

٢٠٠٨/٧/٧ (الساعة ٥,٣٠ صباحاً) رمسيس - القاهرة :

داخل سيارة هيونداى ماتريكس سوداء اللون جلس (باسم) على مقعد السائق، وبجواره فى الكرسى الأمامى جلس (هيثم) فى إنتظار حضور كلاً من (معتز)،(صلاح)، (طارق) للسفر إلى الساحل الشمالى ، لاحديث يدور وكلاهما يستمع إلى ما تذيعه إذاعة إف إم وفى هذه الأثناء فتح (معتز) الباب الأيمن الخلفى للسياره قائلاً وهو يركب :

- جاى فى ميعادى أهوه

- (هيثم متحدثاً) : صباحو يا زيزو

- و(باسم) أيضاً : صبح يا زيزو

- صباحو يا رجاله

- (باسم) قائلاً : فىن صلاح وصاحبه يا معتز ماترن عليهم

- (معتز) مجاباً : لسه قافل معاهم وقالو... أهم داخلين علينا

أهم

- دخل (صلاح) ثم (طارق) أيضاً من الباب الأيمن الخلفى

للسياره قائلين :

- السلام عليكم

-(الباقى) فى نفس التوقيت : وعليكم السلام ورحمة الله وبركاته

- صلاح موجهاً كلامه إلى دكتور طارق وهو يشاور على كل شخص قبل ذكر إسمه :

- معتز ، باسم ، هيثم ، ثم قال لهم دكتور طارق صاحبي وأخويا وجارى

( الجميع ) عدا صلاح : أهلاً وسهلاً دكتور طارق تشرفنا

طارق مجاباً : الشرف ليا تسلموا

( باسم ) قائلاً وهو يشغل محرك السيارة : توكلنا على الله

طارق متمتماً بصوت منخفض : بسم الله الرحمن الرحيم

سبحان الذى سخر لنا هذا وما كنا له مقرنين وإنا إلى ربنا

لمنقلبون

( باسم ) متحدثاً للجميع : حد عاوز يشتري حاجه يا جماعه

قبل ما نطلع على الطريق،

الجميع فى ردود متفرقه : توكل على الله

\*\*\*\*\*

٢٠٠٨/٧/٧ (الساعة ٩ صباحاً) مارينا ٤ - الساحل الشمالي :

في طابور إنتظار دخول السيارات على بوابة مارينا ٤ وقف  
(باسم) بالسياره منتظراً دوره في الدخول، وفي هذه الأثناء وجه  
حديثه إلى (طارق) قائلاً :

- ممكن كارنيه الدخول يا دكتور لو سمحت

- آه حاضر

-أقول للأمن شاليه كام يا دكتور ؟

-شاليه ٥٤

-تمام

-إتفضل الكارنيه

-شكراً

جاء دور سيارة (باسم) في الدخول، وأقبلت ببطء على أمن  
البوابه وأقبل أحد أفراد الأمن على السياره من إتجاه شبك  
(باسم) فأخرج باسم الكارنيه الذى أخذه من (طارق) معطياً  
إياه إلى رجل الأمن الذى بدور بادر باسم بإلقاء التحيه قائلاً :

-حمد الله على السلامه يا بهوات

(الجميع) في ردود متفاوتة : الله يسلمك

-شاليه كام إن شاء الله يا فندم (فرد الأمن موجهاً حديثه إلى

(باسم)

-شاليه 04

-تمام إتفضل يا فندم (قالها فرد الأمن وهو يعطى الكارنيه

لباسم )

-شكراً

-أوصف لى يا دكتور أمشى إزاي (باسم متحدثاً )

-حاضر، وقام طارق بوصف طريق الشاليه إلى باسم

-واضح إن إحنا جينا بدرى أوى (هيثم متحدثاً )

-معتز) قائلاً : ياعم خلينا نلحق اليوم من أوله وبعدين أهل

مارينا مايبصحوش دلوقتى ،دول بيفضلوا سهرانين لحد الصبح

مارينا إتفرج عليها بعد الساعه ٢ الظهر

-)صلاح مشاركاً فى الحوار) : وبعدين ماتنسوش إن النهارده

الجمعه ،كمان فهتلاقى كله فى شاليهاته لحد بعد الصلاه

صحيح (طارق متحدثاً )

\*\*\*\*\*

٢٠٠٨/٧/٧ (الساعة ٩:١٠ صباحاً) مارينا ٤ - الساحل الشمالي :

قال طارق بعدما فتح باب الشاليه :

- السلام عليكم ورحمة الله وبركاته ، ثم أردف بعد أن أضاء

نور الصاله ... إتفضلوا يا جماعه

دخل الجميع إلى الشاليه ، وجلسوا على طاقم الأنتريه الموجود

في صالة الشاليه إلا طارق الذي أخذ يتجول في الشاليه فاتحاً

جميع النوافذ ، وأيضاً لمحابس المياه المغلقه في حمام الشاليه ثم

خرج إلى الصاله حيث يتواجد الباقون ثم قال :

يا جماعه طبعاً إنتوا مش محتاجين عزومه الشاليه ٣ أوض

شوفوا وقسموا النومه براحتكوا المكان مكانكوا

فرد الباقون بشكل متتابع : تسلّم

ثم أكمل طارق كلامه : حابين تروحوا البحر قبل الصلاه وبعد

الصلاه

فرد باسم : لا قبل الصلاه خرينا نلحق اليوم من أوله ، وهز

الباقون رأسهم إشارة إلى موافقتهم.

\*\*\*\*\*

٢٠٠٨/٧/٧ (الساعة ١١:٤٥ صباحاً) مارينا ٤ - الساحل الشمالي :  
بينما الجميع جالسون منذ حوالي ساعه وربع تقريباً على  
إحدى شواطئ مارينا ٤ ..

وبينما الصمت يخيم على المكان ولا صوت يعلو على صوت  
أمواج البحر المتلاحقه ، إذ بصوت أذان الجمعة يخترق الصمت  
معلنناً عن موعد صلاة الجمعة ، وفي هذه الأثناء قام طارق من  
مكانه وهو يقول :

-أنا رايح أصلى الجمعة يا جماعه حد جى معايا ؟

-آه إستنى أنا جى (صلاح ملاحقاً طارق بالرد )

-حد جى معانا يا شباب (صلاح قائلاً)

-لأ روحوا إنتوا (معتز مجابوياً)

-وبعد أن إنصرف طارق وصلاح لأداء صلاة الجمعة، قال باسم

موجهاً كلامه لهيثم ومعتز :

-حد فيكو جاب مزاج معاه ؟

هيثم مجابوياً : لأ

-ولا أنت يا معتز

-لأ

-أمال هنقضى منين فيه حد قريب هنا ؟

على الطريق بره بقى (هيثم مجاوباً)

-طيب بينا نكسب وقت وصلاح وطارق بيصلوا ، صحيح يا  
معتز بما إنك أكثر واحد تعرف صلاح فينا ، صلاح له فى الكيف

ولا مالوش ؟

-لأ مالوش

-وطبعاً صاحبه طارق باين عليه هو كمان مالوش

-آه شكله كده

-طيب بص يا زيزو هخطف نفسى بالعربيه أنا وهيتم نطلع

على الطريق بره، فى السريع نقضى ونيجى بيس

بيس

\*\*\*\*\*

٢٠٠٨/٧/٧ (الساعة ١٢:٤٥ مساءً) مارينا ٤ - الساحل الشمالي :  
إنتهت صلاة الجمعة وعاد صلاح وطارق إلى الشاطئ حيث  
يجلس الباقون، وبمجرد أن وصل طارق وصلاح في تفاوت :

-السلام عليكم

-وعليكم السلام (معتز مجاباً)

-صلاح سائلاً : أمال فين باسم وهيثم ؟

-معتز مجاباً: راحوا يجيبوا حازه وجاين

\*\*\*\*\*

٢٠٠٨/٧/٧ (الساعة ٧:٤٥ مساءً) مارينا ٤ - الساحل الشمالي :

عاد الجميع إلى الشاليه منذ حوالي ساعه ، وبينما هم جالسون  
إذا بطارق يقف

قائلاً : أنا رايح أصلى العشا يا جماعه ، وهشترى حاجات من  
الماركت حد عايز حاجه ؟، ثم قال موجهاً كلامه إلى صلاح جى  
يا أبو صلاح معايا ؟

وبينما صلاح كان يتحدث فى الهاتف ، فى هذه الاثناء قام بإبعاد  
هاتفه المحمول عن أذنه مجاوباً طارق : لاء روح إنت يا دكتور  
طارق قائلاً : السلام عليكم

وعليكم السلام (الجميع فى تفاوت)

بمجرد أن خرج طارق من باب الشاليه همس معتز لباسم  
وهيتم قائلاً :

-إيه الكلام يا رجاله جيبتوا حاجه

باسم مجاوباً : جيبتا حاجات

-طب إيه الكلام

-دلوقتى

-آه فى الإنجاز كده على ما طارق يصلى العشا ويجيب حاجات  
نكون ولعنلنا دبوس

-طب وصاحبك

-مين صلاح

-آه

-لأ عادى

-عادى إيه يعنى مش هيسيح

-لأ هو عارف إننا بنشرب

-ها

-ياعم ما تقلقش ، إنجز بقى

-طب إسبقتنى على المطبخ

دخل معتز مطبخ الشاليه ثم دخل بعده باسم وهيثم ومعهما

كيس أسود متوسط الحجم

وبمجرد أن دخل باسم إلى المطبخ دس يده فى الكيس ليخرج

أربعة قطع من الحشيش

وأنبوبتين صغيرتين مملوئتين بالهروين ، وثلاثة سرنجات وبمجرد

أن رأى معتز هذه الأشياء إتسعت حدقة عيناه ووجهه كلامه إلى

باسم :

-هيروين يا باسم !؟

-أمال فانيلىا !



-عصير مانجه جهينه

-تسلم

-العفو

ثم توجه باسم إلى هيثم ومعتز، واللذان كانا يجلسان على الكنبه المواجهه للكنبه التى كان يجلس عليها صلاح فى صالة الشاليه ثم وضع الصينيه على ترايبزة الأتريه الموجوده أمامهما قائلاً :

-إتفضل يا خويا منك له أظن مش محتاجين عزومه

(هيثم ، ومعتز) :شكراً يابرنس

ثم جلس باسم إلى جوار هيثم ومعتز، وبدأوا فى إستنشاق دخان الحشيش المنبعث من الكوبايه التى قاموا بتحضيرها ، وفى هذه الأثناء أنهى صلاح مكالمته الهاتفية وأخذ يتناول العصير الذى قدمه له باسم، وهو يراقب فى صمت ما يفعله الثلاثى الجالس فى الكنبه المواجهه له، ثم فجأه وبدون مقدمات إنفجر صلاح فى الضحك بشكل هستيرى ثم قام من مكانه ،وأخذ يقفز إلى أعلى وهو يقول أنا ريشه أنا ريشه

ثم توقف عن القفز وأخذ يمسك بفمه ويجذبه إلى الامام وهو يقول (بوقى بيكبر يا جدعان بقى عندى منقار )، ثم جلس

على الكنبه وأنفجر مرة أخرى في الضحك وفي هذه الأثناء بدأ باسم في الضحك فنظر إليه كلاً من هيثم ومعتز، ثم قالوا في تتابع إلى باسم :

-هو أنت فاهم ماله ؟

-باسم مجابوياً وهو يضحك : لاء

-معتز مستطرداً : يابن اللذينه أمال بتضحك عليه؟!.. خلص يا باسم

-إيه يا عم فيه إيه

-خلص صلاح ماله ؟

-وأنا إيش عرفنى

-ماهو إنت الوحيد إالى بتضحك بيقى أنت أكيد فاهم فيه إيه

-مفيش يا عم ده صاحبكم ده طلع دماغه خفيفه أوى ،بقى شعراية هروين تعمل فيه كده

-هيثم ومعتز في نفس واحد مندهشان : شعراية هروين !

-وأنا بحضر لكم العصير قولت اعمل فيه نمره ،وأهو فرصه نضحك شويه والى توقعته لقيته.

هيثم قائلاً : يابن اللذينه أتارينى بقول إيه الحنيه اللى نزلت



-الحقنه دى هتفوقك فى ثوانى وهترجعك احسن من الأول  
ثم بدأ باسم فى تفريغ محتويات الحقنه فى وريد صلاح وهو  
يبتسم إبتسامه خبيثه ثم إستدار إلى هيثم ومعتز قائلاً :  
- ده إحنا هنضحك للصبح  
شكلك هتودينا فى داهيه (معتز قائلاً)  
- داهية إيه يابنى ما إحنا بقالنا سنين بنتنيل نشرب حد  
حصل له حاجه  
بس مش هروين يا باسم  
وهو الهروين إيه والحشيش إيه  
-إيه ده يا جدعان إحقوا إحقوا (هيثم مقاطعاً حديث باسم  
ومعتز مشاوراً فى إتجاه صلاح) ثم بادر هيثم ومعتز بالركض  
نحو صلاح الذى بدأ فى التعرق وبدأت تظهر عليه بوادر  
الدخول فى غيبوبه .  
- صلاح صلاح  
- وبينما باسم يقف مترقباً متابعاً المشهد فى صمت ، إذا بباب  
الشاليه يفتح ويدخل منه دكتور طارق عائداً من صلاة العشاء،  
والذى بمجرد دخوله وإلقاءه السلام وقعت عيناه على الترابيزه  
التي يوجد عليها المواد المخدره فإتسعت حدقتا عينيه

ثم قال غاضباً :

-إيه ده إيه الحاجات دي؟!، إنتوا كنتوا بتشربوا مخدرات؟!  
، ثم نظر إلى صلاح وإتجه إليه مسرعاً وهو يقول : صلاح  
صلاح.. ماله فيه إيه!؟

- ثم أخذ يد صلاح محاولاً قياس نبضه ،وأخذ يجذب جفونه  
إلى أعلى وإلى أسفل ثم إستطرد قائلاً موجهاً كلامه للباقيين :

- محدش رد عليا يعنى.. صلاح ماله إنتوا شربتوه مخدرات ؟  
محدش شربه حاجه هو اللى شرب وهو صغير يعنى (باسم  
مجاوباً )

- بس صلاح ما بيشر بش مخدرات ومن الواضح إنه اخذ  
جرعه زياده عملتله هبوط حاد فى الدورة الدمويه، ولازم يتنقل  
للمستشفى حالاً ، ثم هم قائماً من مكانه وهو يقول:

- انا هروح أشوف دكتور يلحقه، ولأ أشوف حد يعرف رقم  
مستشفى خاصه هنا نطلب إسعافها يجيلنا.

وأثناء توجه طارق نحو باب الشاليه للخروج ،قام باسم  
بالإسراع خلفه وجذبه من ذراعه قائلاً :

- إنت رايح فين إنت عايز تودينا فى داهيه؟

-داهية إيه وزفت إيه ، المهم نلحق الراجل اللى هيموت ده

-ولما المستشفى تعرف إنه شرب جرعه مخدرات زياده هتدخلنا  
في سين وجيم

-هو ده إالى همك؟!!

-أه أمال إيه اللى يهمنى؟!، وبعدين إنت مش دكتور ما تلحقه  
إنت

-انا دكتور صيدلى وهو محتاج دكتور متخصص ،ده غير إنه  
محتاج مستشفى.

-أجاب طارق بهذه الكلمات على باسم، ثم مديده ليفتح  
باب الشاليه ليجد باسم من خلفه

يدفع الباب بقوه لإغلاقه، ثم قام باسم بجذب طارق من  
ذراعه بقوه مرة أخرى قائلاً :

- مفيش مرواح في حته ، ثم وقف باسم أمام باب الشاليه  
مانعاً طارق من الخروج

فإذا بطارق يتوجه نحو باسم ويقوم بجذبه من ملابس محاولاً  
إبعاده عن الباب ليقوم باسم بدفع طارق بيديه في صدره  
لتنشب معركة بالأيدى بينهما وسط محاولات لفض الإشتباك  
من هيثم ومعتز ولكن دون جدوى ، وبينما الإشتباك مازال  
قائماً إذ بطارق يوجه لكمة قويه إلى وجه باسم طرحته على  
ترابيزة الأنتريه ، ثم إستدار سائراً بإتجاه باب الشاليه ، وفي

هذه الأثناء قام باسم بالتقاط حقنة من على ترابيزة الأتريه من الحقن التي كانت في طور التجهيز للملء بالمواد المخدره، ولكنها كانت لازالت فارغه ، ثم توجه بسرعه خلف طارق وقام بغرسها بقوه في رقبته وفرغ الهواء المتواجد بداخلها في رقبة طارق، لتنفجر نافوره من الدماء مع محاولات لطارق لنزع الحقنه من رقبته، ولكن إذ باسم يواليه بضربه قويه على رأسه بفازة كبيره كانت متواجده في الأتريه، ليسقط طارق على الأرض وسط ذهول كلاً من هيثم ومعتز.

\*\*\*\*\*

٢٠٠٨/٧/٧ (الساعة ٩:١٥ مساءً) مارينا ٤ - الساحل الشمالي :

الصمت يخيم على المكان، والجميع يجلس صامتاً داخل الشاليه محاولاً إستيعاب ماحدث مع التفكير فيما سيحدث ، قطع باسم هذا الصمت موجهاً كلامه لهيثم ومعتز قائلاً :

- حد فيكوا عنده حل؟

- حل ! حل إيه دي مصيبه إنت وديتنا كلنا في داهيه (هيثم متحدثاً لباسم)

- داهيه!

- آه داهيه ، مالك مستغرب ليه كده؟

- هو أنت ياباسم مش حاسس باللى إنت عملته؟ عملته!

- عملت إيه؟!

- عملت إيه؟!

- آه عملت إيه

- لا ولا حاجه

- آه ولا حاجه أمان عايزنى أسيبه يروح يبلغ عننا ، ونروح كلنا

في ستين داهيه؟!

- ومين قالك إنه كان هيبليخ ؟

- والمستشفى إلى كان عايزنا ننقل ليها صلاح، مش كانوا  
هيعرفوا إنه مات من تعاطى المخدرات ونخش في سين وجيم  
وهو مين إلى إداله المخدرات؟  
- وهو أنا يعنى كان قصدى أقتله؟! ، بقولكوا إيه إنتوا الإثنين  
خلاص الكلام ممنوش فايده خلونا نفكر في حل نخلص فيه من  
الجثتين دول قبل ما الموضوع ما يتكشف

\*\*\*\*\*

٢٠٠٨/٧/٧ (الساعة ١١:٠٠ مساءً) مارينا ٤ - الساحل الشمالي :  
ساعه ونصف تقريباً مرت والصمت التام والتفكير العميق  
يسيطران على كل من يوجد في الشاليه ، وفجاه وبدون مقدمات  
قطع باسم هذا الصمت الطويل موجهاً كلامه لكلاً من هيثم  
ومعتز قائلاً :

- أنا لقيت حل

- إيه هو؟ (معتز وهيثم في تتابع)

- هنلبس صلاح وطارق شورتات البحر وهزميهم من على  
اللسان ، وبكده يبان إنهم غرقوا وهما بيعوموا.

- إنت بتقول إيه ؟ (معتز قائلاً في غضب)

- إيه إالى إنت بتقولوا ده يا باسم ! (هيثم مصدوماً)

- بقولكوا إيه مفيش وقت للمقاوحه، أنا ماصدقت وصلت  
للحل ده ووصلتله بعد تفكير عميق ،خلونا نتتيل نخلص بقى  
من المصيبه دى ونرجع مصر ، ولو عندكوا حل قولوه لكن لو  
معندكوش يبقىخلصونا .

في هذه اللحظه تبادل هيثم ومعتز نظرات تنم عن القلق  
والحيره وقلة الحيله، ثم بادر هيثم بالحديث إلى معتز قائلاً :  
- واضح إن ماقدمناش حل تانى يا معتز ،خلينا نخلص دور معايا

في شنطهم على شورتات البحر وتعالوا نلبسهالهم .  
(باسم متحدثاً لهيثم ): هتلاقوا شورتات البحر بتاعتهم غالباً يا  
في الحمام يا على المنشر ،لأنهم كانوا بيها في البحر النهارده .  
وبالفعل بدأ باسم وهيثم ومعتز في تغيير ملابس صلاح وطارق  
وإلباسهما شورتات البحر، وبمجرد الإنتهاء من هذا الأمر قال  
( باسم ) موجهاً حديثه لهيثم ومعتز :  
- دوروا في الدواليب كده على ملايات ،وشوفوا كده شماسي  
كبيره من بتاعت الشط في أى حته هنا في الشاليه  
ليه؟! (معتز متسائلاً)  
- عشان نلف فيهم الجتتين دول لحد مانوصل للسان، ولأ  
هنمشي بيهم كده قدام الناس؟! ، هناخد معانا الآيس بوكس  
تمويه، وهناخد الشمسيتين هنحط كل جته في شمسيه راسها  
عند برنيطة الشمسيه وبقيت الجسم مفرود مع رجل الشمسيه  
الخشب وملفوفين بالملايه، وصحيح ماتنسوش تاخدوا موبايلاتهم  
ومحافظهم معاكوا عشان نرميهم في البحر.  
طب ليه نرميهم في البحر؟(هيثم متسائلاً)  
- عشان حضرتك إحنا المفترض إننا جاين نقعد ثلاث تيام  
ونرجع القاهرة فلما الثلاث تيام يعدوا وصلاح وطارق

مايرجعوش بيوتهم أكيد أهلهم هيبتدوا يدوروا، وأكيد هيبلغوا البوليس وطبعى إن أهل طارق ده عارفين إنه هنا فى الشاليه، فالبوليس أكيد هيجى هنا وهيفتش وهيحقق عن سبب غيابهم، وصحيح هتاخدوا موبايلاتكوا إنتوا كمان ومحافظكوا بس هتسيبوا شنطكوا هنا بهدومكوا بكل حاجه بس خدوا هدوم البحر معاكوا .

- مش فاهم (معتز قائلاً )

- ولا أنا (هيثم قائلاً )

- آه نسيت أقولكوا ما إحنا كمان غرقنا

- (هيثم ومعتز فى نفس الوقت بنبره تتم عن الإندهاش ) غرقنا!

- آه غرقنا ، روحنا كلنا شله على البحر سيبنا حاجتنا على الشط .. الآيس بوكس والشماسى والكراسى وهدومنا وموبايلتنا ومحافظنا ،ونزلنا البحر إحنا الخمسه

وغرقنا ، وحد من عمال الشط أو من إالى على الشط سرق محافظنا وموبايلتنا ،وطبعى إالى يسرق موبايل بيقله، وبكده بيقى الأمر منطقى ومايثيرش أى شكوك

وخصوصاً لو البوليس عرف إن إالى كانوا موجودين فى الشاليه خمس أفراد، طيب

لو فردين غرقوا والبوليس لقى جثتهم طيب التلاته إالى كانوا

في الشاليه مبلغوش ليه؟

يبقى الحل الوحيد إن بيان الأمر إن كلنا غرقنا في البحر وبكده

الموضوع يتقفل

ومحدث ينخور وراه .

- طيب هنتحرك الساعه كام؟ (هيثم متسائلاً)

- لا نهدي شويه لحد ما الرجل تخف بره وبعدين نتحرك

- ده على كده هنستنى كثير، ده مارينا مابتتمش

- الإستعجال مش مطلوب، بس في نفس الوقت لازم نتحرك قبل

أول خيط نور

\*\*\*\*\*

٢٠٠٨/٧/٨ (الساعة ٣:٠٠ صباحاً) مارينا ٤ - الساحل الشمالي :

بعد أن قام (باسم) بفتح باب الشاليه ،والوقوف أمامه قرابة الخمس دقائق لمراقبة الأجواء ،دخل إلى الشاليه مرة أخرى وقال موجهاً كلامه لهيثم ومعتز :

- أعتقد إن الجو دلوقتي مناسب ،أنا هقرب العربيه من باب الشاليه وهنطّلع الجثث بسرعه نحطهم في الكنبه اللى ورا، وإنتوا تركبوا جنبى قدام.

(هيثم ومعتز في تتابع ) : تمام

وبالفعل قام هيثم ومعتز بحمل الجثث ووضعوهم على الكنبه الخلفيه للسياره ، ثم قاموا بالجلوس في المقعد الأمامى المجاور لباسم، لينطلق باسم بالسياره مسرعاً في إتجاه اللسان .

\*\*\*\*\*

٢٠٠٨/٧/٨ (الساعة ٣:٣٠ صباحاً) مارينا ٤ - الساحل الشمالي :

غادر باسم وهيثم ومعتز قرية مارينا ٤ للتو عائدين إلى القاهره، بعد أن قاموا بتنفيذ خطتهم بالتخلص من جثتى طارق وصلاح بإلقائهما في البحر من على اللسان ، مع ترك بعض الأغراض على الشاطئء للإيهام في حالة ظهور الجثث بأنه كان هناك أفراد جالسون على الشاطئء ونزلوا للسباحه وغرقوا .

\*\*\*\*\*

٢٠٠٨/٧/٩ (الساعة ٦:٠٠ مساءً) منزل دكتور طارق - منشية

الصدر-القاهرة :

أمسكت إسرائ زوجة دكتور طارق بهاتفها المحمول لكي تتصل بزوجها، وبمجرد أن وضعت الهاتف على أذنها سمعت نفس الرسالة المسجلة التي تسمعها منذ يومين تقريباً (الهاتف الذي طلبته غير متاح حالياً من فضلك حاول الإتصال في وقت آخر) بدت علامات التوتر والقلق تكسو وجه إسرائ بشكل ملحوظ، وهي تنزل الهاتف المحمول من على أذنها رويداً رويداً، ثم قامت بالإتصال بوالدتها ووضعت الهاتف على أذنها في إنتظار الرد وبمجرد أن قامت والدتها بالرد على المكالمه بادرت إسرائ قائلة في لهفة :

- طارق تليفونه بقاله يومين مقفول ياماما، كلمته أكثر من عشرين مرة ومش عارفه أعمل إيه؟

- (والده إسرائ في دهشه): معقوله!

- زى مابقولك كده ياماما

- طيب مش ممكن تكون شبكه يا بنتى؟

- لا ياماما مش شبكة ما هو كلمنى كذا مرة بعد ماوصل

- طيب هو الشاحن بتاعه معاه؟

- مش عارفه، بس حتى لو كان نسيه كان هيشترى واحد من هناك

- طب إهدى بس يا بنتى، ربنا يسترها إن شاء الله ، طيب معكيش رقم حد من أصحابه إالى طالع معاهم؟

- للأسف لأ ، ياريتنى خدت منه رقم حد منهم

- طيب هو المفروض يرجع إمتى ؟

- المفروض بكره

- طيب معلش يا بنتى أصبرى لبكره ، وربنا يسترها إن شاء الله

- مفيش قدامنا إلا كده

- ربنا يستر يا ماما

- ربنا يستر يا حبيبتي ، ولو فيه جديد إبقى طميننى

- حاضر يا ماما

- لا إله إلا الله

- محمداً رسول الله

و بمجرد أن أنهت إسرائه المكامله مع والدتها، إذ بجرس الباب

يرن فتوجهت إسرائه نحو الباب وفتحته لتجد أمامها سيده فى

العشرينات و بمجرد أن وقعت أعين إسرائه على السيده بادرت

السيده بالحديث إلى إسرائه قائلة :

- السلام عليكم
- وعليكم السلام
- مش ده بيت الدكتور طارق
- أيوه يافندم أؤمرى
- الأمر لله أنا أسفه إني جيت من غير ميعاد ، أنا( منال )
- مرات صلاح الصافي إالى ساكن فى غمره جنب صيدلية دكتور طارق
- آه أهلاً وسهلاً طب إتفضلى إتفضلى
- متشكره
- وبعد أن دخلت زوجة صلاح وجلست إستكملت حديثها
- قائلة :
- معلش أصلى بكلم صلاح بقالى يومين وتليفونه مقفول من ساعة آخر مرة إتصل بيا فيها ، ومعييش رقم أى حد من إالى طالعين معاه، وهو كان قايل لى إنه مسافر مع دكتور طارق فروحت الصيدلية وأخذت رقم دكتور طارق وإتصلت بيه لقيته هو كمان مقفول ،فأخذت العنوان من الدكتور إالى فى الصيدليه، هو دكتور طارق بيتصل بحضرتك ؟
- للأسف دكتور طارق هو كمان تليفونه مقفول بقاله يومين،

ومش عارفه اوصله

- ممممم معقوله!؟

- ومش عارفه أعمل إيه؟

- طيب هما مش المفروض إنهم هيرجعوا بكره صح

- آه

- طيب يبقى ماقدمناش غير نستنى لبكره وربنا يستر ، بصى

لو سمحتى إدينى رقم موبايلك وخدى رقمى وأى واحده فينا

توصل لجديد تكلم التانيه تمام

- تمام

- أنا هستتذن بقى وأسفه مره تانيه على الإزعاج

- لا إزعاج ولا حاجه ، بس بسرعه كده ده حتى الكلام خدنا

ومشربتيش حاجه

- معلش خليها المره الجايه علشان سايبه الولاد فى البيت

لوحدهم

- ربنا يخليهملك

- ربنا يخليكى ، سلام عليكم

- وعليكم السلام

\*\*\*\*\*

٢٠٠٨/٧/١٠

(موجز أبناء الثامنة صباحاً على إذاعة الشرق الأوسط )

(استيقظ رواد قرية مارينا ٤ صباح هذا اليوم على وجود جثة على إحدى شواطئ القرية ، هذا والجدير بالذكر أن الجثة مشوهة الملامح ، ورجال وحدة المباحث بقسم شرطة مارينا في المكان لإستجواب عمال الشاطئ وحالة من الذعر والقلق تسيطر على مارينا بأكملها خاصة وأنها الواقعة الأولى التي تحدث في مارينا ، والتحريات جاريه لمعرفة هوية صاحب الجثة وسبب الوفاة ) إلى هنا تنتهى فقرتنا من موجز أبناء الثامنة صباحاً كان معكم رفيق عز الدين من إذاعة الشرق الأوسط تقبلوا تحياتى ..

إستمع باسم إلى هذا الخبر في راديو سيارته وهو في طريقه إلى عمله ، وبمجرد أن وصل إلى مكتبه ورد إليه إتصال على هاتفه المحمول من هيثم ، وبمجرد أن رد باسم على الإتصال سارعه هيثم قائلاً بنبره تتم عن قلق وتوتر :

سمعت .. سمعت يا باسم الخبر إلى إتذاع من شوية على إذاعة الشرق الأوسط؟

(باسم في تماسك ) آه سمعته

- آه سمعته ! بتقولها عادى كده!
- آمال أقولها إزاي؟
- يعنى إيه إزاي يا باسم ، إنت مش حاسس بخطورة الموضوع
- وإيه الخطوره فيه؟
- إيه الخطوره فيه ! ، آمال إحنا رمينا الجثث فى البحر ليه مش
- عشان نخلص من الموضوع كله ؟
- وإنت مكنتش متوقع إن جثه فيهم هتظهر أو الجثتين كمان؟
- لاء أنا قولت إن الميه المالحه هتاكل الجثث أو السمك هايكلهم
- والموضوع هيخلص
- وأنا علشان عامل حساب اليوم ده قولتلكم إننا هنعمل
- إلى يخلى الموضوع بيان إن كلنا غرقنا عشان لو جثه ظهرت
- والبوليس حقق الموضوع بيان طبيعى
- أنا مش عارف بقى، بس أنا قلقان يا باسم
- قلقان من إيه يابنى؟ هو إحنا لينا علاقة بالموضوع؟
- نعم!!!
- أقصد يا بنى قدام الناس والبوليس فيه حاجه تدل على
- إننا نعرف أصلاً صاحب الجثه أو إننا عملنا حاجه؟، وعلى
- العموم ما نقلقش إحنا فى السليم إحنا هنتابع الموضوع من

- بعيد لبعيد، بس إهدى إنت بس عشان محدش يلاحظ عليك  
حاجه، صحيح معتز بيكلمك أو بتكلمه؟  
- لأ من ساعة مارجعنا من الساحل لا كلمنى ولا كلمته  
- طيب إبقى إتصل بيه وشوفه كده  
- أوك  
- عايز حاجه  
- لأ  
- سلام

\*\*\*\*\*

٢٠٠٨/٧/١٠ (الساعة ١٢:٠٠ ظهراً)

داخل وحدة المباحث بقسم شرطة مارينا - الساحل الشمالي :

إيه الأخبار يارجاله فيه جديد (رئيس المباحث متحدثاً إلى

المعاون أشرف والمعاون علاء )

- آه يافندم التقرير المبدئى للطب الشرعى بيقول إن الوفاه

نتيجة إسفكسيا الغرق

- مممم تمام يعنى مفيش شبهة جنائيه؟

- بالضبط يا فندم

- هل حددوا توقيت الوفاه ؟

- بيقولوا من حوالى يومين يا فندم

- يعنى التشوهات إالى فى وش الجثه نتيجة الميه المالحه أو إن

بعض السمك أكل من جلد الوش

- تمام سيادتك

- طيب طلوعوا بيان للإعلام وضحوا فيه الصوره ،علشان مدير

الأمن كل شويه يتصل بيا وعايز يعرف الأخبار الأكيده فى أسرع

وقت عشان الناس قلقانه فى مارينا والدنيا مقلوبه

- تمام سيادتك

- هل فيه بلاغات عندك بخصوص متغيبين أو مفقودين ؟
- لا يافندم
- وطبعاً مفيش أى حاجه توصلنا لشخصية صاحب الجثه
- لا يا فندم مفيش وخصوصاً إنه مش لابس غير شورت بحر
- تمام

\*\*\*\*\*

٢٠٠٨/٧/١٠ (الساعة ١:٠٠ ظهراً) غمره- القاهرة :

وبينما منال زوجة صلاح تشاهد التلفاز، قطع البرنامج الذى كانت تشاهده موجزاً لأهم الأنباء تلى فيه المذيع هذا الخبر العاجل (وردنا للتو التقرير المبدئى للطب الشرعى بخصوص الجثة التى ظهرت على شاطئء مارينا ٤ صباح هذا اليوم والذى أكد أن الوفاة نتيجة إسفكسيا الغرق، وأنه لا توجد هناك اى شبهة جنائية فى الوفاة ونظراً لعدم وجود معلومات عن هوية صاحب الجثة فوزارة الداخليه تناشد كل من له شخص متغيب سرعة التوجه إلى قسم شرطة مارينا للتعرف على الجثة )

وبمجرد أن إنتهى هذا الخبر العاجل سارعت منال بالإمساك بهاتفها المحمول للإتصال بإسراء زوجة دكتور طارق، وبمجرد أن جاوبت إسراء الهاتف سارعت منال بالحديث إليها فى لهفه :  
- السلام عليكم أيوه يا مدام إسراء سمعتى الخبر إلى ذاعوه من شويه

- مين معايا؟

- أنا منال يا مدام إسراء مرات صلاح

- أزيك يا مدام منال، أه سمعته ومن ساعتها وانا مش عارفه  
أتلم على أعصابي

- طيب وبعدين يا مدام إسراء هنعمل إيه؟

- أنا هودى العيال عند ماما وبكره بدرى هسافر
- لوحدك؟
- أه لوحدى
- طيب أنا هاجى معاكى
- تمام يبقى نتقابل الصبح عند السوبر جيت اللى بيسافر
- مرسى مطروح
- الساعه كام؟
- على ٨ الصبح كده
- تمام ، خلاص على خير أشوفك بكره
- إن شاء الله
- مع السلامه
- مع السلامه

\*\*\*\*\*

- ٢٠٠٨/٧/١٠ (الساعه ٧:٠٠ مساءً) - كوبرى القبه - القاهرة :
- آلو (معتز مجاوباً إتصال هيثم)
- أيوه يا معتز إزيك
- تمام
- تمام!

- فينك يا بنى من ساعة مارجعنا من الساحل وإنْت ولا حس  
ولاخبر

- لا مفيش مشغول شويه فى إستلام بضاعه جديده للمحل

- بس يعنى ؟

- عايز إيه يا هيثم؟

- مفيش يا بنى بظمن عليك، أصلى كنت بتكلم أنا وباسم

النهارده الصبح فى التليفون وجيبنا سيرتك وكده

- خير ؟

- مفيش كان بيسألنى عليك

- فيه الخير

- مالك يا بنى بترد الرد برده كده ليه؟

- أومال عايزنى أعمل إيه يعنى يا هيثم ؟، بقولك إيه سيبنى

فى حالى الله يكرمك أنا من ساعة مارجعنا من الساحل وانا

مش عارف اتلم على أعصابى، وإلى كمل عليا الخبر إلى إتذاع

النهارده الصبح فى التليفزيون

- إنت بتقول فيها ما انا كمان زيك

- وباسم ؟

- باسم بيقولى ماتقلقش مفيش ضرر علينا، لإن مفيش أى حاجه

تثبت إننا عملنا حاجه أو لينا علاقة بصاحب الجثه

- يا أخی منه لله باسم ده هو السبب فى المصيبة دى من أولها  
وعايش ولا على باله

- إهدى بس يا معتز العمليه مش ناقصه ، وإحنا فى الأمان  
طول ما إحنا ساكتين فمش عايزين نتصرف تصرفات تثير الشك

فىنا

- ربنا يستر

- ربنا يستر ، عايزين نتقابل يابنى

- إن شاء الله

- ماشى يا برنس عايز حاجه

- تسلم

- سلام

- سلام

\*\*\*\*\*

(الساعة ٨:٠٠ صباحاً) ٢٠٠٨/٧/١١

- موقف السوبر جيت - القاهرة :

تقابلتا منال وإسراء في الموعد، وإستقلتا السوبر جيت المتجه إلى الساحل الشمالى وبمجرد وصولهما إلى قرية مارينا ع ذهبنا إلى الشاليه فوجدتا الباب مغلق دقتا الجرس والباب مراراً ولكن دون جدوى لم يفتح أحد ، فقررتا التوجه سريعاً إلى قسم شرطة مارينا، وبمجرد أن وصلتا طلبتا مقابلة اى ضابط من وحدة المباحث فقام أحد العساكر بتوصيلهما إلى مكتب المعاون أشرف وبمجرد أن دخل العسكرى إلى المكتب برفقة منال وإسراء قال للمعاون أشرف :

- أشرف باشا

- أيوه يا عماد

- المدامات عايزين حضرتك

- إتفضلوا يا فندم ، خير

- حضرتك إحنا أزواجنا مختفين من حوالى أربع تيام تقريباً

(إسراء زوجة د (طارق) مبادرة بالحديث)

- ممكن حضرتك تشرحى أكثر

- حضرتك إحنا من القاهره

- اهلا ببيكم
- أهلا بحضرتك ، وزوجى وزوج مدام منال أصدقاء وأخت زوجى عندها شاليه فى مارينا ٤ ،ومن كام يوم وتحديداً يوم ٧/٧ سافر زوجى و زوج مدام منال ومجموعه من أصحابهم لمارينا ٤ عشان يقضوا ٣ تيام، والمفروض إنهم كانوا يرجعوا إمبراح ولكن مارجعوش ، ده غير إن الإتصال إتقطع معاهم من يوم ما سافروا بليل تقريباً ، كل ماتتصل أنا أو مدام منال بحد فيهم التليفونات تدينا غير متاح.
- ممم ، طيب وأصحابهم إالى كانوا معاهم معكوش رقم تليفون أى حد فيهم؟ ، عنوانه؟
- لا يا فندم ، إحنا ما نعرفش أى حد فيهم
- طيب حضرتك روحتى الشاليه قبل ما تيجى على هنا؟
- أيوه روحت وقعدت أخبط على الباب ومحدث فتح
- هو حضرتك معكيش نسخه من المفتاح
- لاء معييش
- مممم تمام ، يبقى لازم نتحرك نروح الشاليه نشوف الموضوع
- تمام

\*\*\*\*\*

٢٠٠٨/٧/١١ (الساعة ١:٣٠ ظهراً) مارينا ٤ - الساحل الشمالي :

توجه المعاون أشرف وبرفقته المعاون علاء وأربعة أفراد من وحدة المباحث برفقة إسراء و منال إلى الشاليه لتفقد الأمر، ومجرد وصولهم إلى الشاليه دقوا الجرس والباب مراراً ولم يجب أحد، فأمر المعاون أشرف القوه المرافقه له بكسر باب الشاليه فقاموا بالفعل بكسر الباب ومجرد دخولهم إلى الشاليه قام المعاون أشرف بإعطاء تعليماته للمعاون علاء والقوة المرافقه بالانتشار في الشاليه، والبحث عن أى شىء يفيدهم وبعد ربع ساعه من البحث قطع الصمت الذى كان يخيم على المكان  
سؤال المعاون أشرف للمعاون علاء :

- ها يا علاء بيه وصلتوا لحاجه ؟

- البحث الأولي بيقول يا أشرف بيه إن عدد إالى كانوا موجودين

في الشاليه خمسہ .. وده واضح من عدد الشنط

طيب مش ممكن يكونوا أقل من خمسہ يكونوا ثلاثه مثلاً وفيه إثنين منهم جاينين بشنطتين ؟ (المعاون أشرف موجهاً تسائله للمعاون علاء)

ممكن يا أشرف بيه بس مقاسات الكوتشيات والجزم اللى لقيناها مختلفه تماماً عن بعض وده بيرجح إنهم لخمس أشخاص

- ممم ، لقيتوا بطايق أى حد منهم
  - لا يا أشرف بيه
  - يعنى لا بطايق ولا كارنيهات ولا رخص ولا أى حاجه
  - مفيش أى حاجه ولا حتى محافظهم موجوده
  - طيب ما لاقيتوش موبايلات ؟
  - لا يا أشرف بيه خالص
- فى هذه الأثناء توجه المعاون أشرف إلى كلاً من إسرائ ومنال بالسؤال :
- شوفوا كده الشنط دى هل شنط أزواجكم فيها ؟
- فى هذه الأثناء قامت منال وإسرائ على الفور بالتوجه إلى الشنط التى قام رجال المباحث بتجميعها فى مكان واحد فى صالة الشاليه ، وألقنا نظره عليها وتعرفت كلاً منهما بالفعل على شنطة زوجها وأخبرت المعاون أشرف بذلك .
- قال المعاون أشرف موجهاً كلامه لإسرائ ومنال :
- كده إحنا قدام إحتمال واحد وغالباً هو إلى حصل وهو
  - إن أزواجكم وأصحابهم خرجوا ومرجعوش الشاليه تانى ، وغالباً
  - الخروجه دى كانت للشط
  - تقصد حضرتك إنهم ممكن يكونوا غرقوا ( إسرائ متحدثه

وملامح الخوف والقلق تكسو وجهها)

- ده إحتمال وارد بس مش الأكيد، وعلى العموم إحنا هنعمل  
تحريرات بخصوص إختفائهم ده وهنشوف هنوصل لإيه ، بس  
بعد إذن حضراتكم أنا هحتاجكوا تيجوا معايا المشرحه عشان  
تتعرفوا على الجثه اللي لاقينها على الشط إمبراح

\*\*\*\*\*

٢٠٠٨/٧/١١ (الساعة ٥:٣٠ مساءً)

### مشرفة مستشفى مطروح العام :

وصل المعاون أشرف والمعاون علاء وبرفقتيهما إسراء ومنال إلى المشرحه ودخلوا إلى حيث الغرفة التي توجد بها الجثة التي وجدت على الشاطئ، أمس، وبمجرد أن تم رفع الغطاء من على وجه الجثة توجه المعاون أشرف بالكلام إلى إسراء ومنال قائلاً :

- هي الملامح مشوهه شويه بس أعتقد إنكوا ممكن تقدرؤا تتعرفؤا على الجثه لو تخصص حد من أزواجكم.

نظرت إسراء ومنال بأعين تملئها الفزع والخوف والترقب إلى الجثه، وبينما كل منهما تتفحص الجثه إذ بإسراء تبدأ في التراجع إلى الخلف وهى تهز رأسها يميناً ويساراً وأعينها مملؤه بالدموع، ظلت تتراجع إلى الخلف إلى أن إصطدم ظهرها بحائط الغرفة فجلست على الأرض وهى تبكى بحرقه، وفي هذه الأثناء توجه إليها المعاون أشرف الذى بدوره فهم أنها تعرفت على الجثه ، ثم إستدار وسحب كرسى ..

كان موجود فى الغرفة، وطلب منها الجلوس على الكرسى بدلاً من الأرض فلم تستجب، وفى هذه الأثناء توجهت إليها منال

وجلست على الأرض بجوارها وحضنتها في محاوله لمواستها ،  
إستمر الوضع حوالى نصف ساعه وبعدها طلب المعاون أشرف  
من منال ضرورة ذهابهم إلى مكتبه غداً لإستكمال الإجراءات .

\*\*\*\*\*

٢٠٠٨/٧/١٢ (الساعة ١١:٣٠ صباحاً)

- داخل وحدة المباحث بقسم شرطة مارينا - الساحل الشمالي :
- وصلت منال وإسراء إلى وحدة المباحث برفقة شقيق إسراء الذي حضر من القاهرة بعد علمه بما حدث، وبمجرد دخولهم مكتب المعاون أشرف بادر المعاون أشرف موجهاً حديثه إلى إسراء :
- البقاء لله يا مدام إسراء، شدى حيلك ربنا يجعلها آخر الأحزان
- بعد إذنك يا فندم أنا أخو مدام إسراء، وكنت عايز أعرف هو دكتور طارق مات إزاي؟
- أولاً البقاء لله ، ثانياً هو زى ما تقرير الطب الشرعى قال بسبب إسفكسيا الغرق
- طيب والتشوهات إالى فى وشه ؟
- غالباً المياه المالحة والسّمك أكل فى الجثة
- طيب حضرتك وصلتوا لحاجه عن الناس اللى كانت معاه ؟
- إحنا شغالين تحريات من إمبراح على كل الشواطىء بتاعت القرية وربنا يسهل
- طيب إنتوا مش شاكين فى حاجه ؟
- حاجة إيه ؟
- مش عارف بس إن الموضوع ممكن مايكونش غرق

- هو اللي ظاهر قدامنا لحد دلوقتى وبياكده الطب الشرعى  
إن الوفاه بسبب الغرق .. وإن مفيش شبهه جنائيه ، بس أدينا  
شغالين على التحريات ولو فيه جديد طبعاً هنبلغكوا  
- طيب إحنا نقدر نستلم الجثه إمتى عشان ندفنها؟  
- فى أى وقت تقدر دلوقتى ، النيابة أصدرت تصريح بالدفن  
خلاص

وفى هذه الأثناء قطع الحوار دق أحدهم على الباب :

- إتفضل

- معلش يا فندم بس فيه حاجه مهمه لازم أبلغ حضرتك بيها..

فيه جثه تانيه ظهرت على شط مارينا ٤.

\*\*\*\*\*

٢٠٠٨/٧/١٢ (الساعة ١٢:١٠ ظهراً) مدينة نصر - القاهرة :

بينما باسم يباشر عمله في مكتبه ، إذ بجرس هاتفه المحمول يرن

برقم هيثم فجاوب الإتصال قائلاً :

- لسه فاكر

- إزيك يا باسم

- كويس يا خويا ، فينك لا حس ولا خبر من يومين ومال صوتك

محشور كده ليه ؟

- سمعت الخبر إالى ذاعته النشره من شويه ؟

- لاء خبر إيه؟

- الجته الثانيه ظهرت

- ظهرت فين؟

- على الشط في مارينا تقريباً في نفس المكان اللى ظهرت فيه

الجته الأولى

- طيب تمام

- تمام !

- أيوه يا بنى يبقى كده الموضوع إتقفل

- إتقفل إزاي يعنى!؟

- طالما الجتتين ظهوروا يبقى الموضوع إتقفل وإحنا في أمان، وزى

ما قالوا إن الجثة الأولى ماتت بسبب الغرق هيقولوا برضه إن التانيه ماتت بنفس السبب، والموضوع هيتقفل بدون أى ديول، وبعدين قولتلك قبل كده إهدى عشان ما حدش يلاحظ عليك حاجه .

- ربنا يستر

- صحيح كلمت معتز؟

- آه كلمته من يومين بعد ما كلمتك

- وأخباره إيه ؟

- بيقولى مش عارف يتلم على أعصابه من ساعة مارجعنا من الساحل

باسم بصوت خافت فى عصبية:

- أنا مش عارف إنتوا ليه مصرين تودونا فى داهيه!

ومش لاقى سبب لقلقكم ده ؟ حد كلمكم ؟ .. حد جه ناحيتكم؟  
إنتوا هتودونا فى داهيه بأسلوبكم ده .

- ما هو يا باسم برضه الموضوع مش سهل، وحاجه جديده  
علينا

- يابنى ومين كان عايز يعمل كده ظروف وإتحطينا فيها نعمل  
إيه يعنى

- خلاص يا باسم
- خلاص يا هيثم خلاص، المهم إهدوا إنتوا بس وكل حاجه هتبقى تمام
- ربنا يستر
- ربنا يستر ، عايز حاجه
- لاء
- سلام
- سلام

\*\*\*\*\*

٢٠٠٨/٧/١٢ (الساعة ١٢:١٠ ظهراً) مارينا ٤- الساحل الشمالي :

منال جاثية على ركبتيها أمام جثة زوجها صلاح التى ألقاها البحر منذ قليل على إحدى شواطئ القرية ،ولا صوت يعلوا في المكان فوق صوت نحيبها ، دموعها أمواج متلاحقه تحسب أن البحر الذى تجلس أمامه هو إمتداد لدموعها ، ورجال الأمن هنا وهناك والجميع خرجوا من البحر مذعورين وفي هذه الأثناء يقف المعاون ..

أشرف ورجال وحدة المباحث في أنحاء المكان محاولين جمع المعلومات الأولية من الذين شاهدوا الجثة عند ظهورها على الشاطئ ، والمعاون أشرف يعطى تعليماته لرجال المباحث بسرعة تمشييط البحر لإنتشال أى جثث اخرى.

\*\*\*\*\*

٢٠٠٨/٧/١٣ (الساعة ١٠:٣٠ صباحاً) مدينة نصر - القاهرة :

أمسك باسم بهاتفه المحمول وقام بالإتصال بهيتم، وبمجرد أن

جاوب هيتم الإتصال بادر باسم قائلاً بصوت خافت :

- عشان تظمن بس إنت ومعتز

- إيه فيه إيه؟

- أهو مكتوب النهاردة في الجرنان عن إن أهالى الجثث إتعرفوا

عليهم، وكاتبين إسم صلاح وطارق وكاتبين إن سبب الوفاة

إسفكسيا الغرق، وإن مفيش شبهة جنائية ..

وكاتبين كمان إن ذويهم إستلموا الجثث لدفنها، و بكده يبقى

الموضوع إتقفل للأبد.

- إنت متأكد من الكلام ده؟

- لاء مش متأكد ، فيه إيه يابنى مالك هو أنا بقولك كلام من

عندى لو مش مصدق إشتري جرايد النهاردة وإتأكد بنفسك

- تمام

وإبقى بلغ معتز بالكلام ده يمكن يهدى

- أوك يالا سلام

- سلام

\*\*\*\*\*

٢٠٠٨/٧/١٣ (الساعة ١:٠٠ ظهراً)

داخل وحدة المباحث بقسم شرطة مارينا - الساحل الشمالي :

قال رئيس وحدة المباحث موجهاً حديثه للمعاون أشرف :

- فيه جديد يا أشرف في موضوع الناس اللي غرقوا دول؟
- لا يا فندم ، من إمبراح وإحنا مطلعين كذا لانش ومركب غير
- موتوسيكلات الميه لمسح كل شواطئ القريه ، ومفيش أى أثر
- لأى حاجة

- والعمال إالى على الشط مفيش جديد برضه ؟

- لا يا فندم ، كل إالى شافوا الجثة الثانية قالوا إنهم ماشافوهوش
- قبل كده لا لوحده ولا مع حد

- مممم إنت قولتلى إن عدددهم قد إيه ؟

- تقريباً خمسه يا فندم

- ممم ، وإلى ظهوروا جتتين صح؟

- مطبوط يا فندم

- يعنى كده المفروض إننا بندور على ٣ جثث؟

- مطبوط يا فندم

- طيب هل فيه أى بلاغات تغيبات جديده جتلكوا بعد الجثه

- التانيه ما ظهرت ؟

- لا يا فندم

- غريبه !

- بعد إذن حضرتك أنا شايف إنها مش غريبه ولا حاجه ،  
 حضرتك عارف إن فيه ناس ما بتبقاش معرفة أهلها هما فين  
 بالظبط ، وخصوصاً بعض الشباب وواضح من سن الجنتين  
 اللى لاقيناهم إن أصحابهم شباب فمممكن ما يكونوش قائلين  
 لأهاليهم هما فين بالظبط أو هيقعدوا قد إيه ، وبالتالي أهاليهم  
 لسه ماحسوش بحاجه يمكن لما يحسوا يبلغوا ، وممكن يكون  
 الشباب دول من النوعيه إالى عايشه لوحدها وبالتالي مفيش  
 إالى يسأل عن غيابهم ، على العموم الأيام إالى جايه هتبين  
 يا فندم

- تمام شد حيلك يا أشرف وبلغنى بأى جديد توصله لإن معالى  
 مدير الأمن مهتم شخصياً بالموضوع ده لأنه عامل ذعر فى  
 القرية ، وخصوصاً إنه أول مره يحصل

- حاضر يا فندم

- بالتوفيق

- شكراً يا فندم

\*\*\*\*\*

٢٠٠٨/٧/٢١ (الساعة ٢ مساءً) - كوبرى القبة - القاهرة :

وصل معتز للتو إلى محل الموبايلات الخاص به ، وبمجرد وصوله وجد الشاب الذى يعمل معه يمد يده إليه معطياً إياه علبة من الكرتون فبادر معتز سائلاً الشاب :

- إيه ده ؟

- فيه شاب جه من شويه وسابلك العلبه دى، وقالى أديهاك أول ما تيجى

- ما قالكش إسمه إيه أو أى حاجه ؟

- لاء ، لما سألته قالى إنت لما تفتحها هتعرف

إبتعد معتز بالعلبه الكرتون عن الشاب، وذهب إلى أحد أركان المحل وجلس على كرسى، وبمجرد أن فتح العلبة إتسعت حدقتا عينيه وإرتسمت على وجهه ملامح الفزع عندما رأى ما بداخلها ، وأغلق العلبه بسرعه وأخذها وإندفع خارجاً من المحل دون أن يخبر الشاب الذى يعمل معه إلى أين هو ذاهب .

\*\*\*\*\*

٢٠٠٨/٧/٢١ (الساعة ٢:١٠ مساءً) مدينة نصر - القاهرة :

- إتفضل (باسم مجاوباً دق أحدهم على باب مكتبه)
- أستاذ باسم فيه حد جه في الإستقبال تحت وساب لحضرتك
- العلبه دى (فراش الشركه متحدثاً إلى باسم)
- مقالش مين ؟
- لا يا استاذ باسم هو جه سأل على حضرتك وقال إننا نوصل
- العلبه دى ليك
- طيب تمام شكراً
- العفو
- إنتظر باسم إلى حين خروج الفراش من مكتبه، وقام بفتح
- العلبه ليرى ما بداخلها وبمجرد أن فتحها بدت عليه علامات
- التساؤل والإستغراب ليقول بصوت مسموع :
- إيه ده ؟
- فى هذه الأثناء رن هاتفه المحمول برقم هيثم فجواب الإتصال
- قائلاً :
- إيه يا هيثم
- شوفت يا با سم شوفت اللى جالى انا ومعتز من شوي..
- علبه كرتون جواها سرنجه (باسم مقاطعاً حديث هيثم)

- عرفت منين هو ؟ هو أنت كمان جالك ؟

- لسه فاتحها

- طيب وبعدين ؟

- مش عارف

- مش عارف إيه بس يا باسم معتز كلمنى من شويه وهو فى

حاله هيسثيرية وبينه وبين الجنان شعرة ، ومصمم إننا نتقابل .

- نتقابل مفيش مشكله يا هيثم شوف عايزين نتقابل إمتى

ونتقابل ،ولو إنى مش عارف هنتقابل ليه ؟

- مش عارف هنتقابل ليه ؟! ، بقولك إيه يا باسم الكلام فى

التليفون مش هينفع ، أنا هكلم معتز واحد معاه هنتقابل

فين وإمتى وأكلمك تانى ، سلام

- سلام

\*\*\*\*\*

٢٠٠٨/٧/٢١ (الساعة ٥:٠٠ مساءً)

داخل وحدة المباحث بقسم شرطة مارينا - الساحل الشمالي :

باشا : (قالها المعاون علاء بمجرد دخوله إلى مكتب المعاون  
أشرف)

- إزيك يا علاء بيه طمنى فيه جديد ؟

- لا يا باشا مفيش جديد

- إحنا كده مسحنا كل شواطىء القرية صح ؟

- أكثر من مره يا باشا

- لا يبقى كده أعتقد إن التيار سحب بقية الجثث لحتته أبعد

- شكلها كده ، طالما عدى الوقت ده كله من غير ما حاجه

تظهر، ده أنا كنت نايم اليومين اللى فاتوا بحلم بالموضوع ده،

بقيت كل يوم باجى وأنا مستنى جثه جديده تظهر ، الجثتين

اللى ظهروا فى يومين دول ربكوا الواحد وقلبوا الدنيا ده كويس

إن الأمور هديت فى مارينا .

- هو بس عشان الموضوع أول مره يحصل هنا ،وجثتين وفى

يومين مخيفه برضه ، لكن شويه والناس هتنسى والأمور هترجع

لطبيعتها .

- صحيح ، أسيبك أنا وأروح للريس شويه ، أي خدمات

- تسلم

- حبيبي سلام مؤقت

- سلام مؤقت

\*\*\*\*\*



قول على طول من غير تريقه

- أنا من إمبراح وانا عمال أعصر دماغى وبرضه ماوصلتش  
لحاجه (هيثم متحدثاً)

- يا جماعه أنا أصلاً من ساعة ما رجعنا من الساحل ومن  
ساعة اليوم المهيب ده وانا مش عارف أعيش، وحاسس إن  
الموضوع ده مش هيعدى على خير، ومن إمبراح وانا ماأمتش  
وعمال أفكر، ولقيت إن أقرب تفسير للموضوع ده إن كان فيه  
حد شايفنا من أول الموضوع لأخره، و بعث السرنجات دى  
علامه على إنه شافنا بما إنها الأداة إلى تسببت فى موت صلاح  
وطارق، ومش بعيد كمان يكون صورنا وموضوع إنه بعثنا  
السرنجات دى بدايه بيجس بيها نبضنا . (معتز متحدثاً)

- طيب وإلى شافنا ده شافنا مين يا عبقرى ؟ (باسم متسائلاً)  
- مش محتاجه ذكاوة يا باسم ممكن ساعة الدربة وإحنا مش  
مركزين كان فيه شباك مفتوح ولا حاجه وإحنا مش واخدين  
بالنا، وممكن يكون اللى شافنا فضل مراقبنا لحد ما طلعنا  
الجثث وحطيناها فى العرييه، ومش بعيد يكون مشى وانا لحد  
اللسان وشافنا وإحنا بنحدف الجثث فى البحر ويكون مصور كل  
ده (هيثم متحدثاً)

- طيب ويا عم الناصح إالى شافنا ده ومعاه الدليل مارحش  
ليه بلغ ؟

- أكيد عشان يساومنا وياخد مننا فلوس بمن سكوته (معتز  
قائلاً)

- احتمال برضه (هيثم قائلاً)

- شافنا مين وصور مين إيه يا جدعان نظرية المؤامرة إالى إنتوا  
عايشين فيها دى ، أنا بصراحه مش مقتنع باللى إنتوا بتقولوه  
ده ، إنتوا إفترضتوا إفتراضات وعايشين عليها ، وانا بصراحه مش  
مجبر إنى أصدق الإفتراضات دى أوأقتنع بيها ، قولتلكوا إحنا فى  
السليم ومفيش أى شىء يدل إننا لينا علاقة بالموضوع ،

والموضوع إتقفل بتقرير الطب الشرعى إالى قال إنهم ماتوا  
غرقانين ، وأهاليهم إستلموا جثتهم والموضوع إتقفل ، وقولتلكوا  
قبل كده إن إسلوبكوا ده وقلقكوا الزايد عن اللزوم هيخلى  
إلى ما يعرفش يعرف (باسم متحدثاً)

- طيب والسرنجات إالى جت لكل واحد فينا دى يا باسم  
تفسرها بإيه ؟ (هيثم متسائلاً)

- قولتلكوا يا جدعان ممكن تكون وصلتلنا بالغلط ، إنتوا عمركوا  
ما سمعتوا عن طرود بتروح للناس بالغلط ؟



ويقول قبل ما أقوله

- طيب وإيه إالى فيها يا هيثم، دى ما تبرأوش فى حاجه ما هو ممكن يكون أوهمك إنه جاله سرنجه زينا، وقالك أوصافها لإنه هو إالى باعتها، وطبعاً عارف المعاد إالى هتوصلنا فيه، فلما لقاك بتتصل قريب من المعاد إالى المفروض تكون وصلتلك فيه فبيوهمك إنه كمان جاتله واحده زيك، هل إنت شوفته؟  
- طبعاً لاء لإن الكلام كان فى التليفون .

- تيجى معايا يا عم معتز تشوف العلبة والسرنجه ؟

- باباشا ما إنت تلاقيك عامل واحده لنفسك كدليل براه

- إنت زودتها اوى يا معتز وانا ماأسمحلكش

- ياعم تسمح ولا ما تسمحش

قال هايثم محاولا تهدئة الموقف :

- جرى إيه يا جماعه إهدوا الناس بتبص علينا

قال معتز :

- منتش شايف يا هيثم بيتعامل مع الأمر بإستخفاف إزاي ؟

وناسى إنه هو السبب فيه من الأول

قال باسم متحدثاً لمعتز:

- بقولك إيه يابنى مش عايز كتر كلام الواحد مش ناقص وفيه

إلى مكفيه

- ياعم أنا سايبهاالكوا وقايم ،وبقولك إيه يا باسم لا تعرفنى تانى  
ولا عايز أعرفك
- يكون أحسن برضه
- إنصرف معتز بعد المشادة الكلامية التى حدثت بينه وبين  
باسم ، وبمجرد أن إنصرف معتز بادر هيثم بالحديث إلى باسم  
قائلاً :

- مكنش ليه لازمه تشدوا مع بعض يا باسم
- يا بنى وأنا كلمته ؟ إنت مش شايفه من ساعة ما جينا وهو  
عمال يكلمنى إزاي وبيتهم فيا.
- معذور برضه يا باسم
- معذور !؟
- آه معذور طبعاً ،وبعدين ما تنساش إن صلاح كان صاحبه
- طيب ما هو كان صاحبا إحنا كمان
- لاء بس مش زيه ،إنت ناسى إن معتز هو إلى معرفنا على  
صلاح أصلاً
- إنت محسنى إنه كان قصدى
- ما هو بصراحه يا باسم إلى إنته عملته ده غشوميه ، فيه

حد يدى حد هيروين وهو مالوش فى الشرب أساساً  
- بقولك إيه يا هيثم انا مش ناقصك إنت كمان ، ما تفتحش  
فى القديم بقولك إيه يالا بينا أحسن  
- يالا بينا

\*\*\*\*\*

٢٥/٧/٢٠٠٨ (الساعة ٢:٠٠ صباحاً) - كوبرى القبة - القاهرة :

بينما كان معتز يياشر عمله داخل محل الموبايلات الخاص به ويقوم بمراجعة مبيعات اليوم بعد إنصراف الشاب الذى يعمل معه ، وبينما الهدوء يسيطر على المنطقه بأكملها لتأخر الوقت ولإغلاق غالبية المحال أبوابها، إذ بصوت صياح عالى يأتى من خارج المحل خرج على أثره معتز ليرى ما مصدر هذا الصوت، ليجد مشاجرة بين مجموعة من الأشخاص ،حاول التدخل هو وبعض المارة لفض هذا الإشتباك ونجحوا بالفعل في فضه ، ليعود بعدها معتز إلى محله لإستكمال ما كان يقوم به من عمل، وبمجرد أن دخل معتز إلى المحل إذ به يقف فجأه مكانه متخسباً شاحب الوجه ..

بمجرد أن رأى سرنجة مغلقة موضوعة على مكتبه ،ساعتها تأكد أنه ليس بمفرده في المكان وبنظرات يملؤها الفزع بدء يلتفت يميناً ويساراً تحسباً لأى هجوم محتمل ، أسرع معتز بالتقاط العصا الخشبية الغليظة الموجودة بجوار مكتبه والتي كان يضعها لإستخدامها في الدفاع عن النفس وقت الحاجة، وبدء في السير ببطء متجهاً نحو غرفة المخزن الملحقة بالمحل ،وبمجرد أن دخل إلى غرفة المخزن ووضع يده على زر الكهرباء ليضئ

المخزن، إذ به يتلقى من أحدهم ضربه قوية على رأسه لتسود  
الدينا .

\*\*\*\*\*

٢٥/٧/٢٠٠٨ (الساعة ١٠:٣٠ صباحاً) - كوبرى القبة - القاهرة :

طوق أمنى وتجمع للأهالى حول محل موبايلات معتز، ورجال  
مباحث القسم منتشرين فى أرجاء المكان فى محاولة للحصول  
على أى معلومة تفيد فى التوصل لمرتكب الجريمة، وفى هذه  
الأثناء كان أحد معاونى المباحث يسأل الشاب الذى يعمل فى  
المحل مع معتز:

- قولى إيه اللى حصل ؟

حاول الشاب وهو يبكى :

- مفيش حضرتك أنا كنت فى المحل إمبراح لحد الساعة واحدة  
بليل، وسيبت معتز الله يرحمه ومشيت ، وجيت النهاردة  
الصبح عشان أفتح زى كل يوم لقيت المحل مفتوح ، أول ما  
شوفت المنظر إتخضيت وقولت ده أكيد فيه حراميه

دخلوا المحل، المهم خفت أدخل المحل لوحدى روحت ناديت  
لعمرو صاحبنا إالى شغال فى محل جنبنا يدخل معايا، المهم  
عمرو جاب شومه وجه ودخلنا واحدة واحدة والغريبه إننا  
لقينا النور منور، فقولت يعنى مش معقول حراميه هتيجى  
تسرق وتنور النور، المهم حضرتك فضلنا ماشيين فى المحل براحه

لحد المخزن وأول ما دخلنا لقيت معتز الله يرحمه مرمى على الأرض وغرقان في دمه، فجريت أنا وعمرو بره المحل من الخضه وهو طلع التليفون وإتصل بالنجده حضرتك .

- إنت جيت النهارده الصبح الساعه كام ؟

- ٩ الصبح حضرتك

- تمام ، حد تانى شغال معاكوا فى المحل إنت ومعتز ؟

- لا يا فندم أنا ومعتز بس

- طيب فيه حد كان شغال معاكوا ومشى بمشكله قبل كده ؟

- لاء حضرتك أنا من ساعة ما إشتغلت مع معتز وانا بس اللى

شغال معاه

- بقالك قد إيه شغال مع معتز ؟

- سنتين حضرتك

- طيب هل فى السنتين دول حصل أى مشكله مع زبون أو أى

حد قدامك تخليه إنه ممكن يعمل كده فى معتز ؟

- لا يا فندم بالعكس ،ده معتز كان ذوق جداً مع الزباين بتوعه

وكان بيخاف أوى على سمعة المحل ،وما أعتقدش إن فيه مشاكل

بين حد ومعتز تخليه يعمل فى معتز كده

- مम्मم تمام ، طيب فيه حاجه إتسرقت من المحل ؟

- هو حضرتك إالى باين مبدئياً إن فيه حاجات متاخده من على الأرفف، موبايلات وإكسسوارات بس إيه إالى إتسرق تحديداً هيبان لما نجرد المحل
- إنتوا حاطين كاميرات فى المحل ؟
- آه يا فندم عندنا بس إالى دخل سرق ال DVR إالى بيتخزن عليه الفيديوهات
- يعنى أنا أفهم من كلامك إن الأرجح إن الموضوع يكون سرقه، ناس دخلوا على معتز بليل وهو سهران لوحده وحاولوا يسرقوه ولما قاومهم قتلوه
- تقريباً كده يا فندم
- على العموم التحريات هتبين ، عايزك تفوت علينا فى القسم
- حاضر يا فندم

\*\*\*\*\*

٢٧/٧/٢٠٠٨ (الساعة ١١:٠٠ صباحاً) - مدينة نصر - القاهرة :

بينما باسم يباشر عمله داخل الشركة، إذ بجرس هاتفه المحمول

يرن بإتصال من هيثم فجواب باسم الإتصال قائلاً :

- ألو

- أيوه يا باسم

- أيوه يا هيثم إزيك

بصوت مصدوم ومخنوق وبنبره تنم عن إتهام قال هيثم :

- معتز مات يا باسم

- لا حول ولا قوة إلا بالله إمتى ؟

- كلمته أطمئن عليه من شويه لما لا قيته مختفى من آخر مره

كنا مع بعض فيها في الكافيه ، رد عليا الشاب اللى شغال معاه

وقالى إنهم لقوه ميت في المحل بتاعه من يومين

- الله يرحمه ومات إزاي ؟

- بيقولوا لقوه مضروب بشومه على راسه والمحل بتاعه مسروق

- لا حول ولا قوة إلا بالله ، ربنا يرحمه

- هو أنت ماكلمتهوش من ساعتها ؟

- لاء من اخر مره كنا في الكافيه مكلمتهوش، وبصراحه مكنتش ناوى أكلمه بعد إالى عمله آخر مره
- ممممم
- ممممم إيه فيه إيه ؟
- مش عارف
- يعنى إيه مش عارف !؟
- مش عارف يا باسم ،مش عارف فيه حاجه مش مريحانى
- مش مرتاح يا باسم مش مرتاح
- إيه يا بنى مالك إيه اللى مش مرتاح مش مرتاح
- ما أعرفش من أول موضوع السرنجه إالى جاتلنا ده، وأنا مش مرتاح يا باسم وعندى أسئلة كثير وجه أوان إنها تتسئل
- أووووووف إتفضل إسئل ياهيتم
- هو إسمعنى إنت مكلمتنيش لما السرنجه جاتلك وإستنيت لما أنا إالى أكلمك ؟
- إنت مسطول يا بنى؟!هو أنا مش قولتلك لما كلمتنى إبنى
- لسه فاتح العلبة اللى فيها السرنجه ،وإنت بتتصل بيا فطبيعى
- إنك إنت إالى تتصل بيا الاول عشان هى جاتلك قبل منى
- طيب وهى ليه جاتلى أنا ومعترز الأول ؟

- والله حضرتك تقدر تسأل إلی بعثها

- طب ما أنا بسأل إلی بعثها

- هيثم بقولك إيه أنا مش ناقص جنان ، إنت هتعمل زى

معتز إنتوا هتعملولى فيها ملايكة؟ وعازين تغسلوا إيديكوا

من الموضوع بأى طريقه ، لا يا حبيبي الموضوع ده كلنا

مشاركين فيه ، ومحدث برىء منه ، وبعدين إنت ماسكلى إنت

ومعتز على نعمة إنت اللى باعتها إنت اللى باعتها ،طيب وليه

ميكونش حد فيكوا هو اللى باعتها؟

- باسم تفسر بإيه إن معتز أول واحد راحت له السرنجه يموت

مقتول بعدها بكام يوم؟ يعنى أفهم من كده إن الدور عليا

بما إنى تانى واحد جالته السرنجه؟

- والله ما أعرفش وشىء ما يخصنيش

- ما يخصكش

- آه ما يخصنيش يا هيثم

- صحيح يا باسم عندك حق أنا إلی غلطان ، أنا إلی غلطان

إنى فضلت صابر على عيوبك وتصرفاتك البايخه والغير مسئولة

وأقول صاحبى أستحمله لحد ما غرقتنى معاك لكن لحد كده

وطيبه يا صاحبى

- ياعم لا طيبه ولا شريرة، كل واحد ينام على الجنب إلى

يريه

- صحيح عندك حق

- أي خدمه عايز حاجه سلام

٢٠٠٨/٧/٣٠ (الساعة ١١ مساءً) - المنيل - القاهرة :

عاد هيثم للتو إلى بيته منهكاً بعد يوم عمل طويل، وبمجرد ان وصل إلى أحد كنبات الصاله ألقى بجسده عليها مسترخياً ناظراً إلى السقف ، ثوانى وقام من مكانه متجهاً إلى غرفة نومه لتغيير ملابسه ،وهو في طريقه وأثناء مروره أمام البوفيه الموضوع بجوار الطرقة المؤدية إلى غرفة نومه ، إذ به يقف متبيساً في مكانه وذلك بمجرد ان رأى السرنجة المغلقة الموضوعه على البوفيه ، والتي تشبه نفس السرنجه التى أرسلت إليه من قبل ، ساعتها تأكد أن أحدهم دخل شقته أثناء غيابه ، بل ومن الممكن أن يكون لا يزال في الشقة ، بدأ هيثم في التحرك ببطء وحذر بإتجاه المطبخ لإحضار سكين، وفي أثناء سيره تجاه المطبخ تلقى ضربة على رأسه من الخلف من أحدهم أفقدته الوعى ، بعد دقائق أفاق هيثم من غيبوبته ، فتح عينيه ببطئ وهو يشعر بثقل في رأسه من تأثير الضربه التى تلقاها ليجد نفسه مكبلاً في أحد فوتيهات الصالة وفمه مغلق إجبارياً بشريط لاصق ولا يوجد أحد أمامه ، ثوانى وأنى الغريب من خلفه ثم وضع يده على كتفه الأيمن، ثم أكمل

سيره معطياً هيثم ظهره متجهاً نحو البوفيه وبمجرد أن وصل إلى البوفيه ، أمسك بالسرنجة المغلفه ثم بدء في نزع الغلاف من عليها ، وأخرج من جيبه أنبوبة دواء صغيرة الحجم وبدأ في ملئ السرنجة بمحتويات الأنبوبة ، في هذه الأثناء ظل هيثم ناظراً إلى الغريب وهو يحرك جسده بشدة إلى الأمام والخلف في محاولة منه لفك نفسه ولكن بدون جدوى، فالغريب قد كبله بإحكام ، انتهى الغريب من ملئ السرنجة ثم توجه إلى هيثم ببطء ، حاول هيثم تدقيق النظر في الغريب في محاولة منه للتعرف عليه إلا أن الكاب الذي كان يرتديه الغريب على رأسه فضلاً عن الإضاءة الخافته جعللا الملامح غير واضحة ، وقف الغريب خلف هيثم ثم إقترب من أذنه اليمنى وبصوت خافت قال له :

- أنا عارف إنها مكنتش فكرتك من الأول، آه مش فكرتك بس إنت وافقت وساعدت صح ؟ ، وعشان كده أنا مش هتكلم معاك إنت ،أنا كلامى مع صاحب الفكره إنت راجل تابع بتنفيذ أوامر وبس والتابع مصير مش مخير، بصراحه كان نفسى ناخذ وندى مع بعض في الكلام أكثر من كده، بس زى ما قولتلك إنت تابع يعنى ملكش حق الرد وبعدين أنا بصراحه

مستعجل، وإن كنت كمان مستعجل وراك مشوار ولازم تروحه .  
 أنهى الغريب كلامه ثم قام بلف ذراعه اليسرى حول عنق  
 هيثم بقوه، الذى أخذ يتحرك بشده يميناً ويساراً فى محاولة  
 منه لمقاومة الغريب ولكن دون جدوى ، ثم قام الغريب بغرس  
 السرنجه فى عنق هيثم، الذى بمجرد أن إنتهى الغريب من  
 تفريغ محتوياتها فى رقبة هيثم سقط رأسه على صدره، فقام  
 الغريب بفك وثاق هيثم وغادر المكان على الفور .

نزل الغريب من العمارة التى يقطن بها هيثم متلفتاً يميناً  
 ويساراً ، ثم إتجه مسرعاً إلى إحدى الشوارع الجانبية حيث  
 أوقف سيارته ، ثم قام بإستقلالها على الفور وبمجرد أن جلس  
 على مقعد القيادة قام بنزع الكاب الذى كان يرتديه على  
 رأسه، ثم نظر إلى المرآه التى أمامه ليظهر فى المرآه وجه باسم  
 الرشيدى، أخذ نفساً عميقاً ثم حدث نفسه قائلاً :

- كده يا باسم تقدر تنام وإنك مطمئن من غير صداع ولا  
 قلق، هتنام ورقبتك فى إيدك مش فى إيد حد تانى.

\*\*\*\*\*

٢٠٠٨/٧/٣١ (الساعة ٩ مساءً) - عين شمس - القاهرة :

بينما زوجة معتز تجلس في غرفتها وهي ممسكة بصورته ودموعها تتدفق حزناً عليه، إذ بوالدتها تدخل عليها الغرفة وتبادر بالحديث إليها قائلة :

- وبعدين يا بنتى مش تشدى حيلك كده عشان الولاد  
مش مصدقه يا ماما لحد دلوقتى مش مصدقه ، كانوا خدوا  
كل اللى فى المحل بس كانوا سابوه يعيش، إستفادوا إيه لما  
موتوه إستفادوا إيه؟

- إستهدى بالله يا بنتى ده نصيبنا ولا زم نصبر  
- ونعم بالله يا ماما ونعم بالله  
- وبعدين بتوع المباحث أهم شغالين يا حبيبتى، وإن شاء الله  
يجيبوا إالى عمل كده

- وتفتكرى يا ماما لما يجيبوه ده هيرجع معتز؟  
- بس على الأقل يا حبيبتى هيرد نارنا  
- وبعدين يا ماما هيجيبوه إزاي ؟ إذا كان زى ما قالولنا إن إالى  
دخل المحل أخذ معاه الجهاز إالى بيتخزن عليه فيديوهات  
الكاميرات يعنى خلاص.

- يابنتى ده شغلهم بقى خلى أملك فى ربنا كبير

- ونعم بالله يا ماما ونعم بالله.

\*\*\*\*\*

٢٠٠٨/٨/١ (الساعة ٦ مساءً) - التجمع الأول - القاهرة :

وصل باسم للتو إلى منزله ،و بمجرد أن دخل من باب الشقة وأثناء وضعه لميدالية مفاتيحه على الكونسول المتواجد بجوار باب الشقة ، إذ به يجد سرنجه مغلفه موضوعه على الكونسول، إتسعت حدقتنا عيناه وبدت عليه علامات الفزع بدء في النداء على زوجته بصوت مرتفع إلا أنها لم تجيب ، بدء في التحرك ببطء بإتجاه المطبخ لإحضار سكين ،وأثناء توجهه إلى المطبخ إذ بصوت يأتي من إتجاه غرفة النوم ، فقام مسرعاً بالدخول إلى المطبخ وأثناء توجهه إلى درج السكاكين إذ به يشعر بأحدهم خلفه فإستدار بسرعه ليجد زوجته خلفه ، التي بادرت قائلة :

- إيه يا باسم بتدور على حاجه ؟

- لا ده أنا كنت داخل أشرب

- يا شيخ خضتنى، أنا قولت مين إالى فى المطبخ ده ؟

- ما أنا ندهت عليكى أول ما دخلت وإنتى مارديتش

- معلش أنا كنت فى الأوضه بغير لإبنك ومشغلين التليفزيون

عشان كده مسمعتكش

- صحيح بقولك إيه ، إيه السرنجه إالى على الكونسول دى ؟

- دى سرنجه نزلت إشتريتها من شويه عشان إدى لإبنك الدوا

- تمام

- ليه فيه حاجه ؟

- لا مفيش بسأل عادى.

\*\*\*\*\*

٢/٨/٢٠٠٨ (الساعة ٢ ظهراً) - المنيل - القاهرة :

جمع من الأصدقاء والجيران ورجال المباحث في شقة هيثم الذي وجدوه ميتاً في شقته صباح هذا اليوم بعد أن إنقطعت أخباره منذ ثلاثة أيام تقريباً، أثناء معاينه رجال المباحث للمكان بادر أحد معاوئي المباحث بسؤال بواب العماره :

- إنت البواب صح ؟

- ايوه يا فندم

- قولى إيه إالى حصل ؟

- سعادتك أستاذ هيثم متعود كل يوم ينزل يروح شغله الصبح ويرجع بليل

- هو شغال فين ؟

- فى البورصة حضرتك

- تمام كمل

- وبعدين حضرتك أنا متعود إنى أشوفه تقريباً كل يوم، لأنه كتير بيطلب منى أستقضيله حاجات من السوبر ماركت ، وبعدين لاقيته بقاله يجى يومين تلاته لاحس ولا خبر قولت يمكن بايت بره ، والنهارده الصبح لقيت جماعه أفنديه زمايله

في الشغل جاينين يسألوا عليه فطلعت معاهم نخبط ونرن  
الجرس محدش رد ، قعدوا يتصلوا على المحمول لقوه مقفول،  
قمنا مديين الباب كتف دخلنا لاقيناه ميت وهو قاعد على  
الكرسى سعادتك فإتصلنا بالنجده سعادتك.

- تمام ، يعنى إنت مشوفتش هيثم من ثلاث تيام

- ايوه يا باشا

- ولا حد جه سأل عليه ولا زاره ؟

- الكذب خيبه يا باشا، أنى أقدر أقولك إنى متأكد إن محدش

سألنى عليه أما إن حد زاره ولا لاء دى مش متأكد

- يعنى إيه مش متأكد ، إنت مش بواب العماره !

- ايوه يا باشا أنى البواب ، بس ساعات حد من البهوات إالى

ساكنين فى العماره بيعتنى أستفضاله حاجه فممكن يكون حد

جه زاره وأنى مش موجود

- تمام طب روح إنت دلوقتى

- حاضر يا باشا

ثم قام معاون المباحث بالتحدث إلى أحد معاونيه قائلاً :

- إيه الاخبار ؟

- تمام يا فندم هى المعايينه المبدئيه بتقول إن مفيش شبهة

جنائيه في الموضوع ، مفيش علامات كسر سواء في باب الشقه أو الشبابيك ، وبسؤالنا للجيران محدش فيهم حس أو سمع حاجه غير طبيعيه ، واضح إن الأمر طبيعي يا فندم احتمال سكته قلبيه أو هبوط في الدورة الدمويه حاجه من هذا القبيل .  
- تمام على العموم هنشوف تقرير الطب الشرعى هيقول إيه .

٢٠٠٨/٩/٣ (الساعة ١١ صباحاً) مدينة نصر - القاهرة :

بينما باسم يياشر عمله، إذ بجرس هاتفه المحمول يرن ، أمسك بهاتفه ليرى من المتصل فإذا بها زوجته فجاوب الإتصال قائلاً :

- إيه يا جميل

- مشغول

- لا قولى

- طيب انا هروح النهارده أبات عند ماما أنا وأحمد

- طيب تمام

- معاكى فلوس؟

- آه معايا

- طب خلوا بالكوا من نفسكوا ولما توصلوا طمنينى

- حاضر

- يالا سلام

- مع السلامه

\*\*\*\*\*

٢٠٠٨/٩/٣ (الساعة ٨ مساءً) - التجمع الأول - القاهرة :

دخل باسم من باب شقته مباشرة إلى غرفة نومه لتغيير ملابسه، أخرج هاتفه المحمول من جيبه وقام بوضعه على التسريجه، وأثناء وضعه لهاتفه وقعت عيناه على سرنجه مغلفه موضوعه على التسريجه فأمسك بها بإستغراب محدثاً نفسه :

(هى دى نفس السرنجه إالى كانت على الكونسول قبل كده، ولأ غاده إشرتت واحده جديده ؟، وبعدين يا عم إنت شاغل بالك ليه ومركز مع السرنجات كده!، على فكره بالمنظر ده هتلفت النظر ليك إتعامل طبيعى خلاص كل شىء خلص) أنهى باسم حديثه مع نفسه، ثم وضع السرنجه مكانها ثم إتجه نحو الدولاب لتغيير ملابسه، وبمجرد أن فتح الدولاب تلقى لكمة قوية من أحدهم فى وجهه طرحته أرضاً مغشياً عليه .

بعد دقائق أفاق باسم من غيبوبته، ليجد نفسه مكبلاً فى أحد الكراسى فى الريسيبشن وقد أطفئت كل إضاءة الشقه إلا إضاءة السقف الخافته التى تعلو مكان جلوس باسم، الغريب يتحرك فى الظلام وملامحه غير واضح وغير واضح ماذا يفعل، بدأ باسم بالتحدث إلى الغريب قائلاً :

- إنت مين ، ودخلت هنا إزاي ، وعايز إيه ؟ ، لو عايز فلوس  
ريح نفسك مش هتلاقى حاجه هنا ، وأكيد إنت إتاكادت  
بنفسك من ده

قال الغريب بصوت هادىء ومترن :

- أما بخصوص أنا مين فأنا ٧ / ٧ / ٢٠٠٨

إسمى وثلاثي كمان أهو يا عم ، أما بخصوص دخلت هنا إزاي  
فدخلت من البحر

تبسم باسم فى سخرية:

- من البحر !

- آه من البحر ، هو انت ما تعرفش إن الصرف منفذ على البحر  
ولا إيه ؟ ، من البحر على الماسورة العموميه للماسورة الفرعية  
لبلاعة الحمام على الريسبيشن طوالى.

وأما بخصوص عايز إيه فمتقلقش مش جاى أسرك إن الفلوس  
ماتجيش حاجه جنب إالى انا جايلك بخصوصه .... بص تقدر  
تقول إنى جاى أديك تطعيم .

ثم أخرج الغريب من جيبه ثلاثة سرنجات وأكمل حديثه :

- بص يا سيدي ، أنا هديك ثلاث إختيارات للتطعيم وإنت  
إختار إالى يناسبك، السرنجه الأولى دى فيها جرعة هروين



بمجرد أن رأى باسم دكتور (طارق) إتسعت حدقتا عيناه وأصيب بالدهشه قائلاً :

- مستحيل ، ده إحنا راميينك إنت وصلاح من على اللسان بإيدينا ، إنت إزاي لسه عايش؟

- أصلى بر مائى ، إنت عارف يا أخى أنا إالى هيجننى إنتوا ليه عملتوا كده فيا أنا وصاحبكم ؟ هتجنن عشان ألقى تفسير مش لاقى ؟

- عملنا إيه؟! ، إحنا معملناش حاجه صلاح هبّط مننا من غير قصد

- عملتوا إيه؟! صحيح عملتوا إيه شربتوه مخدرات وهو ما بيشربش ،وياريتكم حتى وديتوه مستشفى أو حتى خلتونى ألقه

- تلحقه وتفضحنا صح ؟

- هو ده إالى همك ، الفضايح ومش همك حياة الإنسان الغلبان إالى رميتوه فى البحر وهو حى

- حى ! حى إزاي يعنى ؟

- تقرير الطب الشرعى بتاع صلاح قال إنه مات بسبب إسفكسيا الغرق مش بسبب هبوط حاد فى الدورة الدمويه،

يعنى ده معناه إنه إترمى فى البحر وهو لسه حى ومات  
بسبب الغرق ، وأنا إالى فتحتلكم شاليهى وإديتكوا الأمان يا  
أخى طب صونوا المعامله الطيبه حتى  
- قولتلك مكنش قصدنا يا أخى إن كل ده يحصل ، أعملك إيه  
تانى ؟

- صحيح هما أصحابك فىن مش باينين يعنى؟  
- أصحابي مين  
- إنت هتستهبل ، معتز وهيثم فىن ، قتلتهم ها ؟  
- هما إالى إضطرونى زى ما أنت إضطرتنى قبلهم ، كل واحد  
بيفكر فى نفسه وبس ، المفروض إنى كنت أعمل إيه يعنى ؟  
لا ما تعملش حاجه كفايه عليك كده ، أنا إالى هعمل  
- هتعمل إيه (قالها باسم ثم بدء فى الصراخ عالياً) إالحقونى  
إالحقونى

- لاء لاء الصريخ ده مش مفيد عشان زورك ، وبعدين مفيناش  
من الحركات دى ، أنا بعاملك معامله رجاله وسايب بقك من  
غير لزق هتعييل هقفلهلوك ، صحيح ما قولتليش تتطعم بأنهى  
حقنه ؟ ، بص إنت لو تسألنى كدكتور أقولك هتلا روده ليه؟  
لإن فوايدها كثير ، بتعمل ضيق فى التنفس وشلل ده قبل ما

توقف عضلة القلب وكل ده في حوالي ٣٠ ثانية ها إيه رأيك؟

(باسم صارخاً) إلحقوني ... إلحقوني

إقترب طارق من باسم ثم قام بوضع شريط لاصق على فمه

ثم حدثه قائلاً :

- طالما طلعت مزعج كده وهتصدعنى و أنا بطعمك ، خليك

على وضع صامت أحسن ، ثم قام طارق بنزع غطاء السرنجه

والإقتراب من باسم ، وقبل أن يهيم بحقنه بالحقنه

إذ بإضاءة الريسبيشن تضاء رجال المباحث ينتشرون في أنحاء

الشقه ، وفي هذه اللحظة بادر أحد معاوئ المباحث بالحديث

إلى الدكتور طارق قائلاً:

- متشكرين أوى يا دكتور طارق على التعاون بتاعك كده تمام،

ثم قام رجال المباحث بفك وثاق باسم والقبض عليه ، وقبل

أن يخرجوا من الشقه قام الدكتور طارق بالنظر إلى باسم قائلاً:

- أنا لو كنت مشيت ورا غريزة الإنتقام إالى جوايا كنت

قتلتك، لكن الدكتور بيكون سبب إن الناس تعيش مش تموت .

\*\*\*\*\*

عندما ألقى صلاح وطارق في الماء كانا لا يزالان على قيد الحياة، ولكن حالة الإعياء الشديدة التي كان فيها صلاح، فضلاً عن عدم إجادته السباحة جعلته يفارق الحياة غرقاً، أما الدكتور طارق فنزوله إلى الماء ودخولها في فمه وأنفه جعله يفيق، أثناء مرور أحد عمال الشاطيء بموتوسيكل الماء بالقرب منه فصاح إليه الدكتور طارق فقام العامل بانتشال الدكتور طارق وأوصله إلى الشاطيء، بعدها ذهب الدكتور طارق إلى الشاليه وأرتدى ملبسه وذهب إلى قسم شرطة مارينا، وتقابل مع المعاون أشرف، الذي لم يصدق روايته في البدايه حتى بعد أن أرشده للبحث عن جثة صلاح، فلم يكن الأمر كافياً بالنسبه للمعاون أشرف، فمن الممكن ان يكون طارق هو من ألقى صلاح في الماء، وأخترع هذه الرواية لإلصاق التهمة بغيره والنجاة بنفسه، ولكن بعد مراجعة كاميرات بوابات القرية والتي أثبتت دخول سيارة باسم برفقة دكتور طارق والباقيين، وأثبتت أيضاً توقيت خروج سيارة باسم المريب بدون دكتور طارق وصلاح، فضلاً عن عدم إبلاغ باسم ومن غادروا معه عن غرق طارق وصلاح، بالإضافة إلى مغادرتهم القرية بدون أمتعتهم في تصرف غريب ينم عن نيتهم في إظهار الأمر وكأن جميع من كانوا في الشاليه

قد ماتوا غرقاً ،

إستغل المعاون أشرف الجثه المجهوله الأولى التى ظهرت أثناء البحث عن جثة صلاح بإرشاد الدكتور طارق ، وتم إتفاق مع الدكتور طارق على أن يتم إبلاغ زوجته بأن تتعرف على الجثة بإنها جثته، وأن يتم إشاعة الأمر على ذلك لمراقبة رد فعل باسم ومن معه ، خاصة وأنهم من المؤكد سيتابعون الأمر ، وبتكثيف التحريات تم التوصل إلى إختفاء مفاجىء لمعتز وهيثم، مما زاد الشك فى باسم فتم الإتفاق مع دكتور طارق على الذهاب إلى منزل باسم، ومحاولة إستدراجه لإنتزاع إعتراف منه بجميع جرائمه .

٢٠٠٩/١/٢٠ (الساعة ١٠ صباحاً) - محكمة الجنايات - القاهرة :

(بعد سماع المرافعة والمداولة وأخذ رأى فضيلة المفتى، حكمت المحكمة حضورياً على المتهم باسم محمود سعد الرشيدى بالإعدام شنقاً، وذلك لقتله مع سبق الإصرار صلاح عامر أحمد الصافى ومع سبق الإصرار والترصد كلاً من معتز محمد عادل وهيثم عبد الفتاح البحيرى والشروع فى قتل طارق السيد محمد حسن )

\*\*\*\*\*

تمت